

四庫全書

子部

欽定四庫全書

子部

證治準繩卷七

詳校官太醫院八品吏目_{良黃發}

編修臣倉聖脈覆勘

總校官進士_{臣朱} 鈐

校對官學正_{臣常} 循

謄錄監生_{臣劉家瑛}

欽定四庫全書

證治準繩卷七

明 王肯堂 撰

準繩

諸血門

諸見血證

附九竅出血

毛孔出血

東垣云衄血出于肺以犀角升麻梔子黃芩芍藥生地
紫參丹參阿膠之類主之咯唾血者出于腎以天門

冬麥門冬貝母知母桔梗百部黃蘗遠志熟地黃之類
主之如有寒者乾薑肉桂之類主之 痰涎血者出於

脾葛根黃芪黃連芍藥甘草當歸沉香之類主之 嘔

血出于胃實者犀角地黃湯主之虛者小建中湯加黃
連主之 海藏云胸中聚集之殘火腹裏積久之太陰

上下隔絕脈絡部分陰陽不通用苦熱以定於中使辛
熱以行於外升以甘溫降以辛潤化嚴肅為春溫變凜
冽為和氣汗而愈也然餘毒土苴猶有存者周身陽和

尚未泰然胸中微躁而思涼飲因食冷物服涼劑陽氣復消餘陰再作脈退而小弦細而遲澀而為衄血唾血者有之心肺受邪也下而為便血溺血者有之腎肝受邪也三焦出血色紫不鮮此重沓寒濕化毒凝泣水穀道路浸漬而成若見血證不詳本源使用涼折變乃生矣 陽證溢出鮮血 陰證下如豚肝

上而血者黃芪桂枝湯 白芍當歸湯

中而血者當歸建中湯 增損胃風湯

下而血者芎歸朮附湯 桂附六合湯 若三血證在
行陽二十五度見黃芪四君子湯主之 若三血證在
行陰二十五度見當歸四逆加吳茱萸主之

吐血衄血便血其人陰虛陽走其脈沉而散其外證虛
寒無熱候宜烏金丸散止之法宜上用散下用丸次以
木香理中湯和大七氣湯入川芎煎調蘇合香丸溫之
仁齋直指云血遇熱則宣流故止血多用涼藥然亦
有氣虛挾寒陰陽不相為守榮氣虛散血亦錯行所謂

陽虛陰必走是耳外證必有虛冷之狀法當溫中使血
自歸於經絡可用理中湯加南木香或局方七氣湯加
川芎或甘草乾薑湯其效甚著又有飲食傷胃或胃虛
不能傳化其氣逆上亦令吐衄木香理中湯甘草乾薑
湯 出血諸證每以胃藥收功木香理中湯或參苓白
朮散二分枳殼散一分夾和米湯乘熱調下或真方四
君子湯夾和小烏沉湯米湯調下已上並用薑棗畧煎
亦得右藥不惟養胃益以調氣輩與之並行若夫桔梗

枳殼湯夾和二陳湯薑棗同煎入蘇合香丸少許佐之
又調氣之上藥也

經云歲火太過炎暑流行肺金受邪民病血溢血泄又
云少陽之復火氣內發血溢血泄是火氣能使人失血
者也而又云太陽司天寒淫所勝血變于中民病嘔血
血泄飢衄善悲又云太陽在泉寒淫所勝民病血見是
寒氣能使人失血也又云太陰在泉濕淫所勝民病血
見是濕氣能使人失血也又云少陰司天之政水火寒

熱持於氣交熱病生於上冷病生於下寒熱凌犯而爭
於中民病血溢血泄是寒熱凌犯能使人失血也太陰
司天之政初之氣風濕相薄民病血溢是風濕相薄血
溢也又云歲金太過燥氣流行病反側咳逆甚而血溢
是燥氣亦能使血溢也然則六氣皆能使人失血何獨
火乎 櫻寧生危言云古人言諸見血非寒證皆以血
為熱迫遂至妄行然皆復有所挾也或挾風或挾濕或
挾氣又有因藥石而發者其本皆熱上中下治各有所

宜在上則梔子黃芩黃連芍藥犀角蒲黃而濟以生地黃牡丹皮之類胃血古人有胃風湯正是以陽明火邪為風所扇而血為之動中間有桂取其能伐木也若蒼朮地榆白芍藥之類而濟以火劑大腸血以手陽明火邪為風為濕也治以火劑風劑風能勝濕也如黃連黃芩芍藥藥皮荊芥防風羌活之類兼用雞冠花則又述類之義也驚而動血者屬心怒而動血者屬肝憂而動血者屬肺思而動血者屬脾勞而動血者屬腎血

溢血泄諸蓄妄證其始也予率以桃仁大黃行血破瘀之劑折其銳氣而後區別治之雖往往獲中然猶不得其所以然也後來四明遇故人蘇伊舉間論諸家之術伊舉曰吾鄉有善醫者每治失血蓄妄必先以快藥下之或問失血復下虛何以當則曰血既妄行迷失故道不去蓄利瘀則以妄為常曷以禦之且去者自去生者自生何虛之有予聞之愕然曰名言也昔者之疑今釋然矣 婦人之於血也經水蓄而為胞胎則蓄者自蓄

生者自生及其產育為惡露則去者自去生者自生其
醞而為乳則無復下滿而為月矣失血為血家妄逆產
婦為婦人常事其去其生則一也失血家須用下劑破
血蓋施之於蓄妄之初亡血虛家不可下蓋戒之於亡
失之後

九竅出血 南天竺飲主之或用血餘灰自髮為佳無
即父子一氣者次則男胎髮又次則亂髮皂角水淨洗
晒乾燒灰為末每二錢以茅草根車前草煎湯調下

荊葉搗取汁酒和服 刺薊一握絞汁酒半盞和服如
無生者搗乾者為末冷水調三錢

血從毛孔出 名曰肌衄用人中白不拘多少刮在新
瓦上用火逼乾研令極細每服二錢入麝香少許溫酒
調下外以男胎髮燒灰醃之未效以鬱金末水調鶯翎
掃之即止 九靈山房集云湖心寺僧履師偶搔臍中
疥忽自出血汨汨如湧泉竟日不止瘍醫治療弗效邀
呂元膺往視時已困極無氣可語及持其脈惟尺脈如

蛛絲他部皆無即告之曰夫脈血氣之先也今血妄溢故榮氣暴衰然兩尺尚可按惟當益榮以瀉其陰火乃作四神湯加荊芥穗防風不問晨夜併進明日脈漸出更服十全大補湯一劑遂痊

凡九竅出血皆可用 墻頭苔蘚可以塞 車前草汁可以滴 火燒蓮房用水調 鍋底黑煤可以喫 石榴花片可以塞 生菜服汁可以滴 火燒龍骨可以吹 水煎茅花可以喫 玉機微義曰經云榮者水穀

之精也和調五藏灑陳于六府乃能入于脈也源源而
來生化于脾總統于心藏受于肝宣布于肺施泄于腎
灌溉一身目得之而能視耳得之而能聽手得之而能
攝掌得之而能握足得之而能步臟得之而能液腑得
之而能氣是以出入升降濡潤宣通者由此使然也注
之於脈少則瀉充則實常以飲食日滋故能陽生陰長
取汁變化而赤為血也生化旺則諸經恃此而長養衰
耗竭則百脈由此而空虛可不謹養哉故曰血者神氣

也得之則存失之則亡是知血盛則形盛血弱則形衰
神靜則陰生形役則陽亢陽盛則陰必衰又何言陽旺
而生陰血也蓋謂血氣之常陰從乎陽隨氣運行於內
苟無陰以羈束則氣何以樹立故其致病也易調治也
難以其比陽常虧而又損之則陽易亢陰易乏之論可
以見矣諸經有云陽道實陰道虛陰道常乏陽常有餘
陰常不足婦人之生也年至十四經行四十九而經斷
可見陰血之難成易虧如此陰氣一傷所變立至妄行

於上則吐衄哀涸於外則虛勞忘反於下則便紅積熱
膀胱則癃閉溺血滲透腸間則為腸風陰虛陽搏則為
崩中濕蒸熱瘀則為滯下熱極腐化則為膿血火極似
水血色紫黑熱勝於陰發為瘡瘍濕滯於血則為痛痒
癰疹皮膚則為冷痺蓄之在上則人喜忘畜之在下則
人喜狂墮恐跌仆則瘀惡內凝若分部位身半以上同
天之陽身半以下同地之陰此特舉其所顯之證者治
血必血屬之藥欲求血藥其四物之謂乎河間謂隨證

輔佐謂之六合湯者詳言之矣予故陳其氣味專司之
要不可不察夫川芎血中氣藥也通肝經性味辛散能
行血滯於氣也地黃血中血藥也通腎經性味甘寒能
生真陰之虛也當歸分三治血中主藥也通肝經性味
辛溫全用能活血各歸其經也芍藥陰分藥也通脾經
性味酸寒能和血治虛腹痛也若求陰藥之屬必於此
而取則焉脾胃論有云若善治者隨證損益摘其一二
味之所宜為主治可也此特論血病而求血藥之屬者也

若氣虛血弱又當如長沙血虛以人參補之陽旺則生
陰血也若四物者獨能主血分受傷為氣不虛也輔佐
之屬若桃仁紅花蘇木血竭牡丹皮者血滯所宜蒲黃
阿膠地榆百草霜棕櫚灰者血崩所宜乳香沒藥五靈
脂凌霄花者血痛所宜蕤蓉瑣陽牛膝枸杞子益母草
夏枯草敗龜板者血虛所宜乳酪血液之物血燥所宜
乾薑肉桂血寒所宜生地黃苦參血熱所宜特取其正
治大畧耳人能觸類而長可以應無窮之變矣

診 脫血而脈實者難治 病若吐血復熱衄脈當沉細
反浮大而牢者死 吐血衄血脈滑弱小者生實大者
死 汗出若衄其脈滑小者生大躁者死 嘔血胸滿
引痛脈小而疾者逆也 脈至而搏血衄身熱者死
吐血欬逆上氣其脈數而有熱不得卧者死 諸見血
身熱脈大者難治難治者邪勝也身涼脈靜者易治易
治者正氣復也 衄血者若但頭汗出身無汗及汗出
不至足者死 血溢上行或唾或嘔或吐皆凶也若變而

下行爲惡利者順也血上行爲逆其治難下行爲順其治易故仲景云畜血證下血者當自愈若無病之人忽然下利者其病進也今病血證上行而復下行惡利者其邪欲去是知吉也

鼻衄出血

三因方云衄者因傷風寒暑濕流傳經絡涌泄於清氣道中而致者皆外所因積怒傷肝積憂傷肺煩思傷脾失志傷腎暴喜傷心皆能動血隨氣上溢而致者屬內

所因飲酒過多啖炙燔辛熱或墜墮車馬傷損致者皆
非內非外因也 鼻通於腦血上溢於腦所以從鼻而
出宜茅花湯調止衄散時進折二汧仍令其以麻油滴
入鼻或以萊菔汁滴入亦可茅花白芍藥對半尤穩
糯米炒微黃為末新水下二錢 亂髮燒灰存性細研
水服方寸七併吹鼻中 萱草根搗汁每一盞入生薑
汁半盞相和時時細呷 竹蛭屑水飲調 百藥煎半
燒半生水酒調服 白芨末新汲水調下神效 治鼻

衄久不止或素有熱而暴作者諸藥不效神法以大白
紙一張作十數摺於冷水內浸濕置頂中以熱熨斗熨
之至一重或二重紙乾立止 又方用線紮中指中節
如左鼻孔出血紮左指右鼻孔出血紮右指兩鼻孔齊
出則左右俱紮之 血衄不愈以三稜針於氣街穴出
血更用五味子十粒麥門冬當歸黃芪生地人參各一
錢水煎空心熱服 六脈細弦而瀉按之空虛其色必
白而大不澤者血脫也此大寒證以辛溫補血養血以

甘溫甘熱滑潤之劑佐之即愈理中湯小建中湯 六
脈俱大按之空虛心動面赤善驚上熱乃手少陰心脈
也此氣盛多而亡血以甘寒鎮墜之劑大瀉其氣以墜
氣浮以甘辛溫微苦峻補其血三黃補血湯 實熱衄
血先服硃砂蛤粉次服木香黃連大便結者下之用大
黃芒硝甘草生地瀉火者梔子黃芩黃連犀角地黃湯
可選用之 有頭風自衄頭風纔發則衄不止宜芎附
飲間進一字散 下虛上盛而衄不宜過用涼劑宜四

物湯加參芪麥門五味磨沉香下養正丹八味地黄丸

傷濕而衄腎著湯加川芎名除濕湯 伏暑而衄茅花

湯調五苓散 上膈極熱而衄金沸草散去麻黃半夏

加茅花如荊芥數或用黃芩芍藥湯加茅花一撮虛者

茯苓補心湯生料雞蘇散 飲酒過多而衄茅花湯加

乾葛雞矩子或理中湯去乾薑用乾葛加茅花 癰而

衄不止蘇合香丸一九或以小烏沉湯一錢白湯調下

或煎濃紫蘇湯獨調小烏沉湯或添入黑神散一錢鹽

湯調下亦得仍驀然以水喫其面使驚則血止非特顫而衄凡五竅出血皆治 曾病衄後血因舊路一月或三四衄又有洗面而衄日以為常此即水不通借路之意並宜止衄散茅花煎湯調下或四物湯加石菖蒲阿膠蒲黃各半錢煎熟調火煨石膏末一匙頭許兼進養正丹前諸證服藥不效大衄不止者養正丹多服仍佐以蘇子降氣湯使血隨氣下 衄後頭暈四物湯十全大補湯 有先因衄血衄止而變生諸證或寒熱間作

或喘急無寐病狀不一漸成勞憊當於虛損諸証詳之

舌衄

舌上忽出血如線用槐花炒研末摻之麥門冬煎湯調
妙香散 香薷汁服一升日三 髮灰二錢米醋調服
且傳血出處 文蛤散治熱壅舌上出血如泉五倍子
白膠香牡蠣粉等分為末每用少許摻患處或燒熱鐵
烙孔上

齒衄

血從齒縫中或齒齦中出謂之齒衄亦曰牙宣有風壅

有腎虛風壅者消風散內服外擦

外用加鹽

腎虛者以腎主骨

牙者骨之餘火乘水虛而上炎服涼藥而愈甚宜鹽湯

下安腎丸間黑錫丹仍用青鹽炒香附黑色為末擦之

亦有胃熱牙疼而齦間出血以至崩落口臭不可近人

者內服清胃散甘露飲外用大黃

米泔浸令軟

生地黄

大者薄切

二味旋切各用一二片合定貼所患牙上一夜即愈忌

說話嘗治三人不效唾而血見口中從齒縫舌下來

者每用益腎水瀉相火治之不旬日愈 醫者緒餘
云有姪女十歲因毀齒動搖以苧麻摘之血出不止一
日夜積十一盆用末藥止其處少頃復從口出診其脈
皆洪大有力以三製大黃末二錢枳殼湯少加童便調
下去黑糞數塊其血頓止一男子每齒根出血盈盆
一月一發百藥不效知其人好飲投前劑一服而安
一老嫗患此一發五七日日約升餘投前劑亦安所下
皆有黑糞是知此疾多陽明熱盛所致緣衝任二脈皆

附陽明陽明一經氣血俱多故一發如潮涌急則治其標故投以釜底抽薪之法應手而愈要知腎虛血出者其血必點滴而出齒亦攸攸而疼必不如此之暴且甚也

耳衄

耳中出血以龍骨吹入即止左關脈弦洪柴胡清肝散尺脈或躁或弱六味地黃丸

吐血

夫口鼻出血皆係上盛下虛有升無降血隨氣上越出
上竅法當順其氣氣降則血歸經矣宜蘇子降氣湯加
人參阿膠各一錢下養正丹 亦有氣虛不能攝血者
其脈必微弱虛軟精神疲憊宜獨參湯或人參飲子團
參丸 上膈壅熱吐血脈洪大弦長按之有力精神不
倦或覺胸中滿痛或血是紫黑塊者用生地黃赤芍當
歸牡丹皮荊芥阿膠滑石大黃玄明粉桃仁泥之屬從
大便導之此釜底抽薪法也 血從下出者順從上出

者逆一應血上溢之證苟非脾虛泄瀉羸瘦不禁者皆當以大黃醋製和生地黃汁及桃仁泥牡丹皮之屬引入血分使血下行以轉逆而為順此妙法也不知此而日從事於芩連施藥之屬輔四物而行之使氣血俱傷脾胃兩敗今醫治血證百豈有一生者耶 血既下行之後用薏苡仁用多百合麥門冬鮮地骨皮嗽渴加枇杷葉五味子桑根白皮有痰加貝母皆氣薄味淡西方兌金之本藥因其衰而減之自不再發於虛勞證為尤宜

急欲止之用血餘灰二錢以白湯化阿膠二錢入童
便生藕汁刺薊汁生地黃汁各一杯仍用好墨磨濃黑
頓溫服 胸中煩熱吐血不止口舌乾燥頭疼石膏散
冒雨著湯鬱於經絡血溫妄行從鼻則衄衄行清道
吐行濁道流入胃脘令人吐血用腎著湯頭疼加川芎
最止浴室中發衄 吐血在暑天病人口渴面垢頭暈
乾嘔前茅花燈心麥門冬湯仍入藕節汁側扇栢汁茅
根汁生薑汁少許生蜜亦少許調五苓散血止用生地

黃當歸牡丹皮赤芍藥百草霜末煎服一二貼却用黃
芪六一湯調理 怒氣傷肝者唇青面黑當用雞蘇
丸煎四物湯吞下并用十四友丸燈心麥門冬湯吞下
蓋其中有理肝之藥 打撲傷損吐血先以藕節汁側
扇栢汁茅根汁韭汁童便磨墨汁化阿膠止之却以
川芎當歸白芍藥百合荊芥穗阿膠牡丹皮紫金藤大
黃滑石紅花煎湯調番降香末白芨末與服戴復菴先
用蘇合香丸却以黑神散和小烏沉湯童便調治 勞

心吐血用蓮心五十粒糯米五十粒研末溫酒調服及天
門冬湯勞力太過吐血不止蘇子降氣湯加入參阿
膠用豬肝煮熟蘸白芨末食之吐血久不止松花
散百花煎并常服大阿膠丸未効以伏龍肝二錢米飲
調下速止或飲酒之後悶吐之時血從吐後出或因
啖辛熱而得吐血之證名曰肺疽宜大薊散古方用紅
棗燒存性百藥煎煨等分為末米飲調服二錢飲酒
傷胃吐血理中湯加金鉤子乾葛茅花酒色過度饑

飽吐血効方枇杷葉款冬花北紫苑杏仁鹿茸桑白皮
木通大黃為末煉蜜丸噙化 內損吐血下血或飲酒
太過勞傷於內其血妄行出如涌泉口鼻皆流須臾不
救即死用側柏葉蒸焙一兩半荊芥穗燒灰人參各一
兩為細末入飛羅麪一錢新汲水調如稀糊不拘時服
服 傷胃吐血因飲食太飽之後胃中冷不能消化便
煩悶強嘔吐使所食之物與氣共上衝臍因傷裂胃口
吐血色鮮正赤腹亦絞痛自汗其脈緊而數者為難治

也宜理中湯加川芎乾葛各半錢或只依理中本方加
川芎扁豆尤好不必乾葛若渴甚用葛丸則白朮丸
曹氏必用方云吐血須煎乾薑甘草作湯與服或四物
理中湯亦可如此無不愈者若服生地黃竹茹藕汁去
生便遠三因方云理中湯能止傷胃吐血以其方最理
中脘分利陰陽安定血脈按患人果身受寒氣口受冷
物邪入血分血得冷而凝不歸經絡而妄行者其血必
黯黑其色必白而大其脈必微遲其身必清涼不用薑

桂而用涼血之劑殆矣臨病之工宜詳審焉 有時或
吐血兩口隨即無事數日又發經年累月不愈者宜黑
神散和小烏沉湯常服 吐血人多發渴名為血渴十全
大補湯或黃芪人參五味子地黃麥門冬葛根枇杷
葉量胃氣虛實用之 吐甚頭暈發為寒熱者降氣湯
合四物湯各半貼加阿膠一錢若單發熱者茯苓補心
湯吐血之後有潮熱咳嗽脈洪大而數五至以上不
可治也 金匱方心氣不足吐血衄血瀉心湯主之大

黃二兩黃連黃芩各一兩水三升煮取一升頓服之此
正謂心手少陰經之陰氣不足本經之陽亢甚無所輔
肺肝俱受其火而病作以致陰血妄行而飛越故用大
黃泄去亢甚之火黃芩救肺黃連救肝使之和平則陰
血自復而歸經矣雲岐子加生地名犀角地黃湯 又
云吐血不止栝葉湯主之栝葉乾薑各二兩艾三把以
水五升取馬通汁一升合煮取一升分溫再服凡吐血
不已則氣血皆虛虛則生寒是故用栝葉栝葉生而西

向乃稟兌金之氣而生可制肝木木主升金主降取其
升降相配夫婦之道和則血得以歸藏於肝矣故用是
為君乾薑性熱止而不走用補虛寒之血艾葉之溫能
入內而不炎於上可使陰陽之氣反歸於裏以補其寒
用二味為佐馬通者為血生於心心屬午於是用午獸
之通主降火消停血引領而行為使仲景治吐血惟此
二方可以為準繩觸類而長之

咳嗽血

或問欬血只從肺出他無可言耶曰肺不獨欬血而亦唾血蓋肺主氣氣逆為欬腎主水水化液為唾腎脈上入肺循喉嚨挾舌本其支者從肺出絡心注胸中故二藏相連病則俱病於是皆有欬唾血也亦有可分別者涎唾中有少血散漫者此腎從相火炎上之血也若血如紅縷在痰中欬而出者此肺絡受熱傷之血也其病難已若欬白血必死白血淺紅色似肉似肺也然肝亦唾血肝藏血肺藏氣肝血不藏亂氣自兩脇逆上唾而

出之內經有血枯症先唾血為氣竭傷肝也 熱壅於肺能嗽血久嗽損肺亦能嗽血壅於肺者易治不過涼之而已損於肺者難治漸以成勞也熱嗽有血宜金沸草散加阿膠一錢痰盛加瓜蒌仁貝母勞嗽有血宜補肺湯加阿膠白芨一錢嗽血而氣急者補肺湯加阿膠杏仁桑白皮各一錢吞養正丹或三炒丹間進百花膏亦可用七傷散大阿膠丸 丹溪云嗽血乃火升痰盛身熱多是血虛 痰帶血絲出童便竹瀝止之 經

血逆行或血腥吐血唾血韭汁服立效 韭汁童便合
和隔湯頓熱磨鬱金濃汁盪勻服之其血自消 千金
方治一切肺病欬唾唾膿血用好酥三十斤煉取凝當
中醍醐服一合日三升即止 薏苡仁十兩杵碎水三
升煎取一升入酒少許服或以薏苡仁細末煮豬肺白
蘸食之 上氣喘息欬嗽唾血咯血人參細末雞子清
調三錢五更初服便去枕仰卧忌酸醎酢醬麪等物及
過醉飽 嗽咯血成勞眼睛疼四肢困倦脚膝無力五

味子黃芪散

脈大發熱喉中痛是氣虛用參芪蜜炙

黃栢荆芥地黃當歸韭汁童便少加薑汁磨鬱金飲之

嗽血久而成勞或勞病成而嗽血肌肉消瘦四肢倦

怠五心煩熱咽乾頰赤心忡潮熱盜汗減食黃芪鼈甲

散人參黃芪散 陰虛火動而嗽血者滋陰保肺湯

二三年間肺氣上喘咳嗽咯唾膿血滿面生瘡偏身黃

腫人參蛤蚧散 蛤蚧補肺勞虛嗽有功治久嗽不愈

肺間積虛熱久則成瘡故嗽出膿血曉夕不止喉中氣

塞胸膈噎痛用蛤蚧阿膠生犀角鹿角膠羚羊角各一兩除膠外皆為屑次入膠分四服每服用河水三升於銀石器內慢火煮至半升濾去滓臨卧微溫細細呷之其滓候服盡再搥都作一服以水三升煎至半升如前服傷寒後傷肺欬唾膿血胸脇脹滿上氣羸瘦麥門冬湯脈浮大者作虛治用前虛勞條諸補藥若浮大而上壅甚者雞蘇丸脈沉滑有力者當用攻攻中有補丹溪治台州林德芳年三十餘得咳而咯血發熱

肌體漸瘦衆醫以補藥調治數年其證愈甚診其六脈皆濇此因好色而多怒精血耗少又因補塞藥太多榮衛不行瘀血內積肺氣壅遏不能下降治肺壅非吐不可精血耗少非補不可唯倒倉法二者俱備但使吐多於瀉耳兼灸肺俞五次而愈 脈浮數忌灸若誤灸之必唾血唾血而脈浮數其不可治又可知也 脈經云

肺傷者其人勞倦則欬唾血

此為一項以人參救肺散治之

其脈細緊

浮數皆唾血此為躁擾嗔怒得之肺傷氣壅所致

此為一項

以降氣寧神
之藥治之

猪心一個竹刀切開勿令相離以沉香

末一錢重半夏七個入在縫中紙裏蘸小便內令濕煨
熟取出去半夏只喫猪心此方嗽血吐血均治 熱嗽
咽疼痰帶血絲或痰中多血其色鮮者並宜金沸草散
若服涼藥不愈其色瘀者此非熱證宜杏子湯 咳嗽
甚而吐血者鮮桑白皮一斤米泔浸三宿淨刮上黃皮
剉細入糯米四兩焙乾一處搗為末每服一二錢米飲
調下 久嗽咯血成肺痿及吐白涎胸膈滿悶不食扁

豈散 肺痿吐膿血甘桔加阿膠紫苑湯 肺痿痰中
有血絲盜汗發熱熱過即冷食減劫勞散前薏苡仁一
味方 欬而胸滿心胸甲錯振寒脈數咽乾不渴時出
濁唾腥臭久之吐膿如粥者肺癰也然待吐膿而後覺
為癰不已晚乎千金云欬唾膿血其脈數實者為肺癰
若口中欬即胸中隱痛脈反滑數此肺癰也更於本門
細查之

咯血

咯血不嗽而咯出血也咯與唾少異唾出于氣上無所阻咯出于痰氣鬱于喉嚨之下滯不得出咯而乃出求其所屬之藏咯唾同出于腎也治咯血之方宜用童便青黛以瀉手足少陽三焦與膽所合之相火而薑汁為佐用四物地黃牛膝輩以補腎陰安其血也 櫻寧生危言云咯血為病最重且難治者以肺手太陰之經氣多血少又肺者金象為清肅之藏金為火所制迫而上行以為咯血逆之甚矣上氣見血下聞病音謂喘而咯

血且咳嗽也 初得病且宜白扁豈散去半夏加貝母
入生地黃藕節尤佳及濃磨京墨調黑神散小烏沉湯
各一錢或新掘生地黃淨洗生薑少許搗汁去滓溫進
又有以生薑一片四面蘸百草霜含嚥如百草霜已淡
吐出再蘸如薑已無味則吐出易之 勞瘵吐咯血七
珍散加阿膠當歸各半錢惡甜人更加百藥煎半錢仍
調鍾乳粉尤佳一味鍾乳粉用糯米飲調吐血嗽血亦
治 因飽屈身傷肺吐咯血者白芨枇杷丸或白芨蓮

鬚散 治咯血黃藥子漢防已各一兩為末每服一錢
七水一盞小麥二十粒同煎食後溫服 白芨一兩藕
節半兩為末每一錢湯調服 新綿灰半錢酒調下
薏苡仁為末熟煮豬胰切片蘸藥食後微空時取食之
青黛一錢杏仁四十粒去皮尖以黃明蠟煎黃色取
出研細二味同研勻却以所煎蠟少許溶開和之捏作
錢大餅子每服用乾柿一個中破開入藥一餅合定以
濕紙裹慢火煨熟取出糯米粥嚼下

洩血

痛者為血淋不痛者為溺血血淋別見淋門經云悲哀太甚則胞絡絕胞絡絕則陽氣內動發則心下崩數洩血也又云胞移熱於膀胱則癰溺血是溺血未有不本於熱者陳無擇以為心腎氣結所致曾不思聖人之言簡意博舉一而可十者也血雖主於心其四藏孰無血以為養所尿之血豈拘於心腎氣結者哉若此類推之則五藏凡有損傷妄行之血皆得如心下崩者滲於胞

中五藏之熱皆得如膀胱之移熱傳於下焦何以言之
肺金者腎水之母謂之連藏況恃之通調水道下輸膀
胱者也肺有損傷妄行之血若氣逆上者既為嘔血矣
氣不逆者如之何不從水逆下降入於胞中耶其熱亦
直抵腎與膀胱可知也脾土者勝水之賊邪也水精不
布則壅成濕熱濕熱必陷下傷於水道腎與膀胱俱受
其害則陰絡傷傷則血散入胞中矣肝屬陽陽主生化
主疏泄主納血腎屬陰血閉藏而不固必滲入胞中正

與內經所謂傷肝血枯症時時前後血者類也大抵洩
血淋血便血三者雖以前後陰所出之數血有不同然
於受病則一也故治分標本亦一也其散血止血之藥
無越於數十品之間惟引導佐使各走其鄉者少異耳
先與生料五苓散和四物湯若服藥不效其人素病
於色者此屬虛證宜五苓散和膠艾湯吞鹿茸丸或八
味地黃丸或鹿角膠丸或辰砂妙香散和五苓散吞二
項九子若小便自清後有數點血者五苓散加赤芍藥

一錢亦有如砂石而色紅却無石淋之痛亦屬虛證宜
五苓散和膠艾湯或五苓散和辰砂妙香散吞鹿茸丸
八味丸鹿角膠丸 乾膠炙搗末酒和服鹿角膠尤妙
每服一二兩 髮灰二錢茅根車前草煎湯調下 當
歸四兩酒三升煮取一升頓服 鏡面草自然汁加生
蜜一匙服之以八正散加麥門冬葱煎服 小便澀痛
藥內調海金沙末一錢夏枯草燒灰存性為末米飲或涼
水調下 車前草自然汁數合空心服 實者可以調

胃承氣湯加當歸下之 脈經云尺脈滑氣血實婦人
經脈不利男子尿血宜服朴硝煎大黃湯下去經血針
關元瀉之

咳而且溲血脫形其脈小勁是逆也 咳溲血形肉脫
脈搏是逆也

下血

腸風 臟毒

血之在身有陰有陽陽者順氣而行循流脈中調和
五藏灑陳六府如是者謂之榮血也陰者居於絡脈專

守藏府滋養神氣濡潤筋骨若其藏感內外之邪傷則
或循經之陽血至其傷處為邪氣所阻漏泄經外或居
絡之陰血因著留之邪僻裂而出則皆滲入腸胃而泄
矣世俗每見下血率以腸風名之不知風乃六淫中之
一耳或風有從腸胃經脈而入客者或肝經風木之邪
內乘於腸胃者則可謂之腸風若其他不因風邪而腸
胃受火熱二淫與寒燥濕怫鬱其氣及飲食用力過度
傷其陰絡之血者亦謂之腸風可乎許學士謂下清血

色鮮者腸風也血濁而色黯者藏毒也肛門射如血線者脈痔也然腸風挾濕者亦下如荳汁及紫黑瘀血不必盡鮮正當以久暫為別耳然要之皆俗名也世醫編書者或以瀉血為腸風或分瀉血與腸風藏毒為二門皆非也 先血而後便此近血也由手陽明隨經下行滲入大腸傳於廣腸而下者也赤小荳當歸散主之 先便而後血此遠血也由足陽明隨經入胃淫溢而下者也黃土湯主之 下血腹中不痛謂之濕毒下血血

色不鮮或紫黑或如荳汁黃連湯主之 下血腹中痛

謂之熱毒下血血色鮮芍藥黃連湯主之 東垣治宿

有腸血症因五月大熱喫杏腸癖下血遠三四尺散漫

如篩腰沉沉然腹中不痛血色紫黑是陽明少陽經血

證升麻補胃湯

濕毒

太陰陽明腹痛大便常溏泄若不

泄即秘而難見在後傳作濕熱毒下鮮紅血腹中微痛

脇下急縮脈緩而洪弦中指下得之按之空虛和中益

胃湯

濕熱

腸癖下血另作一派其血淅出有力而遠

射四散如篩下腹中大作痛乃陽明氣衝熱毒所作也

升陽除濕和血湯

濕熱

腸澼下血紅或深紫黑色腹

中痛腹皮惡寒右三部脈中指下得之俱弦按之無力

關脈甚緊肌表陽明分涼腹皮熱而喜熱物熨之內寒

明矣益智和中湯

挾寒

夫腸澼者為水穀與血另作

一派如渾桶涌出也夏濕熱太甚正當客氣盛而主氣

弱故腸澼之病甚也以涼血地黃湯主之黃柏知母炒

各一錢青皮炒槐子炒當歸熟地各五分水一盞煎七

分溫服如小便澀臍下悶或大便前後重調木香檳榔
細末各半錢稍熱於食前空心服如裏急後重又不去
者當下之如腹中動搖有水聲而小便不調者停飲也
診是何藏以去水飲藥瀉之假令脈洪大用瀉火利小
便之類是也如胃虛不能食而大渴不止不可用淡滲
之藥止之乃胃中元氣少故也與七味白朮散補之如
發熱惡熱煩躁大渴不止肌熱不欲近衣其脈洪大按
之無力或無目痛鼻乾者非白虎湯症也此血虛發躁

當以黃芪一兩當歸二錢咬咀水煎服如大便秘塞或裏急後重數至圞而不能使或少有白膿或少有血慎勿利之利之則必至病重及鬱結不通以升陽除濕防風湯升其陽則陰氣自降矣 素問云結陰者便血一升再結二升三結三升駱龍吉云結陰之病陰氣內結不得外行血無所稟滲入腸間故便血也其脈虛澀者是也因血結不行故下古方有結陰丹羅謙甫治因強飲酸酒得腹痛次傳泄瀉十餘日便後見血或紅或紫

腸鳴腹痛服涼藥如故仍不欲食食則嘔酸心下痞惡
冷物口乾煩躁不得安卧其脈弦細而微遲手足稍冷
以平胃地榆湯溫中散寒除濕和胃數服病減大半又
灸中脘二十七壯引胃氣上升次灸氣海百壯生發元氣
灸則強食生肉又以還少丹服之至春再灸三里二十七
壯溫脾壯胃生發元氣次服芳香之劑慎言語節飲食
而愈 八物湯去生地黃甘草加官桂名胃風湯治風
冷乘虛入客腸胃水穀不化泄瀉注下及腸胃濕毒下

如豈汁或下瘀血日夜無度蓋亦結陰之類也為陰氣
內結故去甘寒而加辛熱結者散之也 潔古云如下
血防風為上使黃連為中使地榆為下使 若血瘀色
紫者陳血也加熟地黃 若血鮮色紅者新血也加生
地黃 若寒熱者加柴胡 若肌熱者加地骨皮 此
證乃甲欺戊也風在胃口中焦濕泄不止濕既去盡而
反生燥庚欺申也本無金氣以甲勝戊虧庚為母復讐
也故經曰亢則害承乃制是反制勝已之化也若脈洪

實痛甚者加酒浸大黃 戴復菴以色鮮為熱色瘀為
寒熱血連蒲散寒血理物湯血色鮮紅者多因內蘊熱
毒毒氣入腸胃或因飲酒過多及啖糟臠炙烤引血入
大腸故瀉鮮血宜連蒲散吞黃連阿膠丸及香連丸或
一味黃連煎飲大瀉不止者四物湯加黃連槐花仍取
血見愁草少許生薑搗取汁和米飲服於血見愁草中
加入側柏葉與生薑同搗汁尤好 有暑毒入腸胃下
血者一味黃連煎湯飲 腸風下血以香附末加百草

霜米飲調服加入麝香少許其應尤捷 冷氣入客腸
胃下瘀血理中湯不効宜黑神散米飲調下或用膠艾
湯加米湯煎吞震靈丹 癰撲內損惡血入腸胃下出
濁物如瘀血者宜黑神散加老黃茹為末酒調 酒積
下血不止糞後見用神麴一兩半白酒藥二九同為末
清水調捏作餅子慢火上炙黃為細末每服二錢白湯
調下亦治泄瀉 海藏治梅師大醉醒發渴飲水及冰
茶後病便鮮紅先與吳茱萸丸翌日又與平胃五苓各

半散三大服血止復自利又與神應丸四服自利乃止
或問何不用黃連之類以解毒曰若用寒藥其疾大變
難治寒飲內傷復用寒藥非其治也況血為寒所凝入
大腸間而便下血溫之乃行所以得熱則自止 唐生
病因飲酪水及食生物下利紫黑血十餘行脾胃受寒
濕毒與六神平胃散半兩加白朮三錢以利腰臍間血
一服愈 櫻寧生卮言云腸風則足陽明積熱久而為
風風有以動之也藏毒則足太陰積熱久而生濕從而

下流也風則陽受之濕則陰受之戴氏要訣云藏毒者

蘊積毒氣久而始見腸風者邪氣外入隨感隨見三因

方五痔藏毒腸風之辯甚詳藏毒腸風之血出于腸藏

間五痔之血出于肛門蝕孔處治各不同

無擇翁烏連湯治脈痔外

無形而所下血一線如箭或點滴不能已此由脈竅中來也詳見痔門

腸風藏毒不拘糞

前糞後並宜米飲湯調枳殼散下酒者黃連丸或枳殼

散下烏梅丸此乃因登廁糞中有血却與瀉血不同或

用小烏沉湯和黑神散米飲調下血色清鮮者以瓦松

燒灰研細米飲調服宜減桂五苓散加茅花半錢吞荆
梅花丸仍以側柏葉同薑搗爛冷水解下侵些米飲佳
如血色淡濁者胃風湯吞蒜連丸或烏荊丸或棕灰散
仍以米飲調香附末或三灰散 腸風腹中有痛下清
血先當解散腸胃風邪甚者肛門腫疼敗毒散加槐角
荊芥或槐花湯枳殼散 藏毒腹內畧疼濁血兼花紅
膿併下或肛門腫脹或大腸頭突出大便難通先以拔
毒疏利之劑追出惡血膿水然後以內托并涼血祛風

量用人虛兼以參苓朮助養胃氣 諸般腸風臟毒
並宜生銀杏四十九個去殼膜爛研入百藥煎末丸如
彈子大每兩三九空心細嚼米飲下 下血久面色痿
黃漸成虛憊下元衰弱宜黃芪四君子湯下斷紅丸或
十全大補湯或黃芪飲 中蠱藏府敗壞下血如雞肝
如爛肉其證唾水沉心腹絞痛者是也治之方馬蘭根
末水服方寸匕隨吐則出 白蘘荷葉密安病人席下
勿令病人知覺自呼蠱王姓名 蚯蚓十四枚以苦酒

三升漬之服其汁 蝟毛燒末水服方寸匕

吐毒

苦瓠一

枚水二升煮取一升服

吐

或用苦酒一升煮瓠令消服之

診腎脈小搏沉為腸澼下血血溫身熱者死 淫而

奪精身熱色天然及酒後下血血篤重是逆也 心肝

澼亦下血二藏同病者可治其脈小沉濡為腸澼其身

熱者死熱見七日死 身熱則死身寒則生 脈懸絕

則死滑大則生 脈沉小留連者生數疾且大有熱者

死 腹脹便血脈大時絕是逆也如此者不及一時而

死矣 胃移熱于脾傳為虛腸澼死不治 脾脈外鼓
沉為腸澼久自已 肝脈小緩為腸澼易治

畜血

夫人飲食起居一失其宜皆能使血瘀滯不行故百病
由汚血者多而醫書分門類症有七氣而無畜血予故
增著之 衄血畜血上焦 心下手不可近畜血中焦
臍腹小腫大痛畜血下焦 三焦畜血脈俱在左手
中 畜血上焦活人犀角地黃湯 畜血中焦仲景桃

仁承氣湯 畜血下焦仲景抵當湯韓氏地黃湯生漆
湯 海藏云畜血可用仲景抵當湯九恐庸醫不知藥
性用之太過有不止損血之候老弱虛人之禁也故立
生地黃湯蟲蟲水蛭大黃桃仁內加生地黃乾漆生藕
藍葉之輩也 又云生漆湯一方亦恐抵當湯九下之
太過也是以知乾漆為破血之劑比之抵當湯則輕用
之通則重用之破積治食則重也食藥內乾漆硃砂非
氣實不可用也 如牙齒等蝕數年不愈當作陽明畜

血治之以桃仁承氣湯細末煉蜜丸桐子大服之好飲者多有此疾屢服有效 若登高墜下重物撞打箭鏃刃傷心腹胸中停積鬱血不散以上中下三焦部分分之以易老犀角地黃湯桃仁承氣湯抵當湯丸之類下之亦有以小便同酒煎治之者更有內加生地黃當歸煎服者亦有加大黃者 又法虛人不禁下之者以四物湯加穿山甲煎服妙亦有用花藥石散以童子小便煎服或酒調下 此藥與寒藥正分陰陽不可不辨也



證治準繩卷七

欽定四庫全書

子部
證治準繩卷八

詳校官太醫院八品吏目_臣黃發

編修臣倉聖脈覆勘

總校官進士_臣朱鈐

校對官學正_臣常循

謄錄監生_臣鄧以伊

欽定四庫全書

證治準繩卷八

明 王肯堂 撰

準繩

諸痛門

頭痛

偏頭痛

雷頭風

頭重

大頭

天行

眉稜骨

痛

醫書多分頭痛頭風為二門然一病也但有新久去留之分耳淺而近者名頭痛其痛卒然而至易於解散速

安也深而遠者為頭風其痛作止不常愈後遇觸復發也皆當驗其邪所從來而治之今世俗治頭痛不從風則從寒安知其有不一之邪乎試考內經論頭痛所因以明之如風從外入振寒汗出頭痛新沐中風為首風當先風一日頭痛不可以出內大寒內至骨髓髓以腦為主腦逆故頭痛齒亦痛少陽司天之政初之氣風勝乃搖候乃大濕其病氣怫於上頭痛二之氣火反鬱白埃四起其病熱鬱於上頭痛少陽司天火淫所勝民病

頭痛發熱惡寒如瘧歲金不及炎火乃行復則陰厥且
格陽反上行頭腦戶痛延及腦頂發熱太陽之勝熱反
上行頭項頂巔腦戶中痛目如脫太陽之復心痛痞滿
頭痛太陰司天濕淫所勝腰脊頭項痛時眩太陰在泉
濕淫所勝病衝頭痛目似脫項似拔太陰之復頭項痛
重而掉瘕尤甚陽明之復欬煩心病在膈中頭痛傷
寒一日巨陽受之頭項痛腰脊強靈樞謂風痺股脛爍
足如履水時如入湯煩心頭痛時眩悲恐短氣不出三

年死凡此皆六氣相侵與清陽之真氣相薄而痛者也
至於頭痛甚則腦盡痛手足寒至節死頭痛巔病下虛
上實注以腎虛不能引膀胱之氣故爾心煩頭痛耳鳴
九竅不利腸胃之所生心熱病者卒心痛煩悶頭痛面
赤刺手少陰太陽肺熱病者頭痛不堪汗出而寒刺手
太陰陽明腎熱病者項痛員員澹澹然刺足少陰太陽
靈樞謂厥頭痛面若腫起而煩心取足陽明太陰厥頭
痛頭脉痛心悲善泣取血與厥陰厥頭痛貞貞頭重而

痛取手足少陰厥頭痛意善忘按之不得取頭面左右
動脈後取足太陰厥頭痛項先痛腰脊為應先取天柱
後取足太陽厥頭痛頭痛甚耳前後脈湧有熱瀉出其
血後取足少陽頭痛不可取於膺者有所擊墮惡血在
於內若肉傷痛未已可側取不可遠取也頭痛不可刺
者大痺為惡日作者可令少愈不可已頭半寒痛先取
手少陽陽明後取足少陽陽明膀胱足太陽所生病頭
顙項腦戶中痛膽足少陽所生病頭痛凡此皆藏府經

脉之氣逆上亂於頭之清道致其不得運行壅遏經隧而痛者也蓋頭象天三陽六府清陽之氣皆會於此三陰五藏精華之血亦皆注於此於是天氣所發六淫之邪人氣所變五賊之逆皆能相害或蔽覆其清明或瘀塞其經絡因與其氣相薄鬱而成熱則脉滿滿則痛若邪氣稽留則脉亦滿而氣血亂故痛甚是痛皆為實也若寒濕所侵雖真氣虛不與相薄成熱然其邪客於脉外則血泣脉寒寒則脉縮卷緊急外引小絡而痛得溫

則痛止是痛為虛也如因風木痛者則抽掣惡風或有汗而痛因暑熱痛者或有汗或無汗則皆惡熱而痛因濕而痛者則頭重而痛遇天陰尤甚因痰飲而痛者亦頭昏重而痛憤憤欲吐因寒而痛者絀急惡寒而痛各與本藏所屬風寒濕熱之氣兼為之狀而痛更有氣虛而痛者遇勞則痛甚其脉大有血虛而痛者善驚惕其脉芤用是病形分之更兼所見證察之無不得之矣

東垣曰金匱真言論云東風生於春病在肝俞在頸項

故春氣者病在頭又諸陽會於頭面如足太陽膀胱之
脉起於目內眥上額交巔直入絡腦還出別下項病則
衝頭痛又足少陽膽之脉起於目銳眥上抵頭角病則
頭角額痛夫風從上受之風寒傷上邪從外入客經絡
令人振寒頭痛身重惡寒治在風池風府調其陰陽不
足則補有餘則瀉汗之則愈此傷寒頭痛也頭痛耳鳴
九竅不利者腸胃之所生乃氣虛頭痛也如氣上不下
頭痛巔疾者下虛上實也過在足少陰巨陽甚則入腎

寒濕頭痛也有厥逆頭痛者所犯大寒內至骨髓髓以腦為主腦逆故令頭痛齒亦痛有心煩頭痛者病在膈中過在手巨陽少陰乃濕熱頭痛也 凡頭痛皆以風藥治之者總其大體而言之也高巔之上惟風可到故味之薄者陰中之陽自地升天者也然亦有三陰三陽之異 太陽經頭痛惡風寒脉浮緊川芎獨活之類為主 少陽經頭痛脉弦細往來寒熱用柴胡黃芩主之 陽明經頭痛自汗發熱不惡寒脉浮緩長實者升麻

葛根石膏白芷主之 太陰經頭痛必有痰體重或腹

痛為痰癖脉沉緩者蒼朮半夏南星主之 少陰經頭

痛三陰三陽經不流行而足寒氣逆為寒厥其脉沉細

麻黃附子細辛湯主之 厥陰經頭疼項痛或吐痰沫

冷厥其脉浮緩吳茱萸湯主之 三陽頭痛藥羌活防

風荆芥升麻葛根白芷柴胡川芎芍藥細辛葱白

連鬚

陰證頭痛只用溫中藥如理中薑附之類 風濕熱頭

痛上壅損目及腦痛偏正頭痛年深不愈並以清空膏

主之如苦頭痛每料中加細辛二錢如太陰脉緩有痰
名曰痰厥頭痛去羌活防風川芎甘草加半夏一兩半
如偏頭痛服之不愈減羌活防風川芎一半加柴胡一
倍如發熱惡熱而渴此陽明頭痛只與白虎湯加白芷
丹溪云東垣清空膏諸般頭痛皆治惟血虛頭痛從魚
尾相連痛者不治又云治少陽頭痛如痛在太陽厥陰
者勿用益謂
頭巔痛也

頭旋眼黑頭痛宜安神散川芎散 熱

厥頭痛雖嚴寒猶喜風寒微來暖處或見烟火其痛復
作宜清上瀉火湯後用補氣湯 風熱頭疼石膏散荆

芥散 冬月大寒犯腦令人腦痛齒亦痛名曰厥逆出
奇病論中宜羌活附子湯 頭痛胸中痛食減少咽嗑
不利寒冷脉左寸弦急宜麻黃吳茱萸湯 濕熱在頭
而頭痛者必以苦吐之輕者用透頂散搐鼻取涎 新
沐中風為首風頭面多汗惡風當先風一日則病甚至
其風日則少愈大川芎丸主之 風氣循風府而上則
為腦風項背怯寒腦戶極冷神聖散主之 凡治頭痛
皆用芎芷羌防等辛溫氣藥升散者由風木虛不能升

散而土寡於畏得以壅塞而痛故用此助肝木散其壅
塞也若風盛疎散太過而痛服辛散藥反甚者則宜用
酸澀收而降之乃愈乳香蓋落散之類是也

以上
外因

頭

痛耳鳴九竅不利腸胃之所生東垣以為此氣虛頭痛
也用人參黃芪主之 羅謙甫治栢參謀六十一歲先

患頭昏悶微痛醫作傷寒解之汗出後痛轉加復汗解
病轉加而頭愈痛每召醫用藥雷同到今痛甚不得安
卧惡風寒不喜飲食脉弦細而微氣短促嬾言語經曰

春氣病在頭今年高氣弱清氣不能上升頭面故昏悶
此病本無表邪因發汗數四清陽之氣愈虧損不能上
榮亦不能外固所以病增甚宜升陽補氣頭痛自愈製
順氣和中湯經曰陽氣者衛外而為固也誤汗之衛外
之氣損故黃芪甘溫補衛實表為君人參甘溫補氣當
歸辛溫補血芍藥味酸收衛氣為臣白朮陳皮炙甘草
苦甘溫養衛氣生發陽氣上實皮毛腠理為佐柴胡升
麻苦辛引少陽陽明之氣上升通百脉灌溉周身者也

川芎蔓荊子細辛辛溫體輕浮清利空竅為使一服減

半再服全愈

血虛頭痛自魚尾

眉尖後近髮際曰魚尾

上攻頭

痛當歸川芎主之

當歸一兩酒一升煮取六合飲至

醉效

當歸川芎連翹熟芩各二錢水煎去渣入龍腦

薄荷末二錢乘沸泡之鼻吸其氣候溫即服服即安卧

效 氣血俱虛頭痛者於調中益氣湯加川芎蔓荊子

細辛其效如神

痰厥頭痛眼黑頭旋惡心煩亂半夏

白朮天麻湯主之痰厥頭痛非半夏不能療眼黑頭旋

風虛內作非天麻不能解天麻苗謂之定風草獨不為風所搖以治內風之神藥內風者虛風是也黃芪甘溫瀉火補元氣實表虛止自汗人參甘溫調中補氣瀉火二朮甘溫除濕補中益氣澤瀉茯苓利小便導溫橘皮苦溫益氣調中而升陽炒麴消食蕩胃中滯氣麥芽寬中助胃氣乾薑辛熱以滌中寒黃檗苦寒用酒洗以療冬日少火在泉而發躁也東垣壯歲病頭痛每發時兩頰盡黃眩暈目不欲開嬾於言語身體沉重兀兀欲吐

數日方過潔古老人曰此厥陰太陰合而為病名曰風痰宜以局方玉壺丸治之可加雄黃白朮以治風濕更有水煮金花丸灸俠溪二穴各二十七壯不旬日愈 鼻鼽腹腫頭痛病在胃經云陽明所謂客孫脉則頭痛鼻鼽腹腫者陽明并於上上者則其孫絡太陰也故頭痛鼻鼽腹腫也 動作頭重痛熱氣潮者屬胃 丹溪云頭痛如破酒炒大黃半兩茶煎服 婁全善云病在胃而頭痛者必下之方愈也如孫兆以利膈藥下張學士

傷食頭痛郭茂恂以黑龍丹下其婢產後汚血頭痛皆下咽即安是也 心煩頭痛病在膈中過在手巨陽少

陰東垣清空膏之類治之 頭痛巔病下虛上實過在

足少陰巨陽甚則入腎許學士謂之腎厥頭痛也其脉舉之則弦按之則堅用玉真丸治之戴復菴用正元散或大三五七散入鹽煎服或於正元散內入炒椒十五粒下來復丹間進黑錫丹有服諸藥不効其痛愈甚宜茸硃丹 素問曰頭疼巔疾下虛上實過在足少陰巨

陽甚則入腎狗蒙招尤目眩耳聾下實上虛過在足少
陽厥陰甚則入肝下虛者腎虛也故腎虛則頭痛上虛
者肝虛也故肝虛則頭暈狗蒙者如以物蒙其首招搖
不定目眩耳聾皆暈之狀也故肝厥頭暈腎厥顛痛
不同如此肝厥宜鈎藤散傷食頭痛胸膈痞塞噯酸
噫敗卵臭畏食雖發熱而身不痛宜治中湯加砂仁一
錢或紅丸子傷酒頭痛惡心嘔吐出宿酒昏冒眩暈
宜葛花解酲湯怒氣傷肝及肝氣不順上衝於腦令

人頭痛宜沉香降氣散并蘇子降氣湯下養正丹 上
熱頭目赤腫而痛胸膈煩悶不得安卧身半已下皆寒
足骭尤甚大便微秘宜既濟解毒湯 外有臭毒頭痛
一味喫炒香附愈 頭痛連睛痛石膏鼠粘子炒為末
茶清食前調下 頭風搐鼻白芷散川芎散如金散瓜
蒂神妙散火筒散鬱金散

偏頭風頭半邊痛者是也丹溪云有痰者多 左屬風
荆芥薄荷 左屬血虛川芎當歸 右屬痰蒼朮半夏

右屬熱黃苓 川芎散 細辛散 萆撥猪膽搗鼻

中 萆麻子半兩去皮大棗十五枚去核右共搗令熟
塗紙上用筋一隻捲之去筋納鼻中良久取下清涕即
止 生蘿蔔汁仰卧注鼻中左痛注右右痛注左 一

婦人患偏頭痛一邊鼻塞不聞香臭常流清涕時作鼻
氣服徧治頭痛藥如芎蝎等皆不効後一醫人教服局
方芎犀丸不十數服忽作嚏突出一鉗稠膿其疾遂愈
雷頭風頭痛而起核塊者是也或云頭如雷之鳴也為

風邪所客風動則作聲也

夫治雷頭風諸藥不効者

證與藥不相對也夫雷者震也震仰盂故東垣製藥用
荷葉者象震之形其色又青乃述類象形當煎局方中
升麻湯主之名曰清震湯 張子和用茶調散吐之次
用神芎丸下之然後服烏荊丸及愈風餅子之類衰者
用涼膈散消風散熱 頭上赤腫結核或如酸棗狀用
排針出血則愈 亦有因痰火者痰生熱熱生風故也
痰火上升壅於氣道兼乎風化則自然有聲輕如蟬鳴

重如雷聲故名雷頭風也用半夏

牙皂薑汁
煮一兩

大黃

酒浸
透濕

紙包煨再浸再
煨三次二兩

白殭蠶連翹橘紅桔梗天麻

各五錢

片苓

酒炒
七錢

薄荷葉

三錢

白芷青礞石粉草

各一錢

末之水浸蒸餅

丸如菽豆大食後臨卧茶吞二錢以痰利為度然後用
清痰降火煎藥調理

真頭痛天門真痛上引泥丸夕發旦死旦發夕死為腦
為髓海真氣之所聚卒不受邪受邪則死不可治古方
云與黑錫丹灸百會猛進參沉烏附或可生然天柱折

者亦難為力矣

大頭痛頭腫大如斗是也是天行時疫病 東垣監濟

源稅時長夏多疫癘初覺憎寒體重次傳面目腫盛目不能開上喘咽喉不利舌乾口燥俗云大頭天行親戚不相訪問如染之多不救張縣丞亦患此醫以承氣湯加藍根下之稍緩翼日其病如故下之又緩終莫能愈漸至危篤東垣診視具說其由曰夫身半已上天之氣也身半已下地之氣也此雖邪熱客於心肺之間上攻

頭而為腫盛以承氣下之瀉胃中之實熱是誅罰無過
殊不知適其病所為故遂處方用黃連黃芩味苦寒瀉
心肺間熱以為君橘紅玄參苦寒生甘草甘寒瀉火補
氣以為臣連翹鼠粘子薄荷葉苦辛平板藍根味甘寒
馬屁勃白殭蠶味苦平散腫消毒定喘以為佐新升麻
柴胡苦平行少陽陽明二經不得伸桔梗味辛溫為舟
楫不令下行共為細末用湯調時時服之拌蜜為丸噙
化服盡良愈乃施其方全活甚衆名普濟消毒飲子

海藏云大頭病者雖在身半已上熱伏於經以感天地
四時非節瘟疫之氣所著以成此疾至於潰裂膿出而
又染他人所以謂之疫癘也大抵足陽明邪熱太甚實資
少陽相火為之熾多在少陽或在陽明甚則逆傳視其
腫勢在何部分隨其經而取之濕熱為腫木盛為痛此
邪發於首多在兩耳前後所先見出者為主為根治之
宜早藥不宜速恐過其病所謂上熱未除中寒已作有
傷人命矣此疾是自外而之內者是為血病况頭部分

受邪見於無形之處至高之分當先緩而後急先緩者
謂邪氣在上著無形之部分既著無形所傳無定若用
重劑大瀉之則其邪不去反過其病矣雖用緩藥若又
急服之或食前或頓服咸失緩體則藥不能除病矣當
徐徐漬無形之邪或藥性味形體據象服餌皆須不離
緩體及寒藥或酒炒浸之類皆是也後急者謂前緩劑
已經高分瀉邪氣入於中是到陰部染於有形質之所
若不速去反損陰也此却為客邪當急去之是治客以

急也且治主當緩者謂陽邪在上陰邪在下各為本家病也若急治之不惟不能解其紛而反致其亂矣此所以治主當緩也治客當急者謂陽分受陽邪陰分受陰邪主也陰分受陽邪陽分受陰邪客也凡所謂客者當急去之此治客以急也假令少陽陽明之為病少陽為邪者出於耳前後也陽明者首面大腫也先以黃芩黃連甘草通炒過剉煎少少不住服呷之或服畢再用大黃或酒浸或煨又以鼠粘子新瓦上炒香咬咀煎去

查內芒硝各等分亦細呷之當食後用徐得微利及
邪氣已只服前藥如不已再服後藥依前次第用之取
大便利邪已即止如陽明渴者加石膏少陽渴者加瓜
蒌根湯陽明行經加升麻葛根芍藥之類太陽行經加
羌活防風荊芥之類選而加之並與上藥均合不可獨
用散也 黑白散 甘桔湯加鼠粘子連翹大黃玄明
粉白殭蠶荊芥 殭蠶一兩錦紋大黃二兩薑汁丸彈
子大新汲泉水和生蜜調服 外用井底泥調大黃芒

金匱要略卷八
八
硝末敷之

眉稜骨痛眉骨者目系之所過上抵於腦為目屬於腦也若諸陽經或挾外邪鬱成風熱毒上攻於頭腦下注於目睛遂從目系過眉骨相併而痛若心肝壅熱上攻目睛而痛則亦目系與眉骨牽連併痛若胸膈風痰上攻者亦然若太陰之勝濕氣內鬱寒迫下焦痛留項互引眉間其痛有酸者有抽掣者有重者有昏悶者便可審是就氣之勝也 東垣選奇湯治眉骨痛不可忍神

効丹溪云屬風熱與痰治類頭風風熱者宜祛風清
上散因痰者二陳湯加酒黃芩白芷防風寒者羌烏散
戴云眼眶痛有二證皆屬肝有肝虛而痛纔見光
明則眼眶骨痛甚宜生熟地黃丸有肝經停飲發則
眉稜骨痛不可開晝靜夜劇宜導痰湯或小芎辛湯加
半夏橘紅南星茯苓

頭風屑 羅謙甫云肝經風盛木自搖動尚書云滿招
損老子云物壯則老故木陵脾土金來尅之是子來為

母復仇也使梳頭有雪皮見肺之證也肺主皮毛大便
實瀉青丸主之虛者人參消風散主之 萬病紫苑丸
治頭多白屑每服三九至五七丸薑湯下 按上治法
必有風熱上攻頭目眩痛諸證而後用之若止是白屑
但宜白芷零陵香之屬外治而已

頭重何因得之曰因天之濕淫外著也因人之濕痰上
蒸也因在下之陰氣逆於上也皆得而頭重何以言之
頭象於天其氣極清地氣重濁地者陰也土濕也若外

著內極必壅蔽清道致氣血不利沉滯於經隧脉絡故
重內經曰陽氣者因於濕首如裹是外濕蔽著者也又
曰脾熱病者先頭重是胃脉引其熱上於頭也太陰之
復飲發於中濕氣內逆太陽上留而重痛胸中掉癰尤
甚太陽之勝濕氣內鬱亦頭重巨陽之厥腫首頭重發
為狗仆靈樞謂督脉之別名曰長强挾脊上項散頭上
下當肩胛左右別走太陽虛則頭重高搖之俠脊之有
過者取之所別也 東垣云頭重如山此濕氣在頭也

紅豆散鼻內搐之

又方羌活根燒

連翹

各三錢

紅豆

半錢

右為末搐鼻 為飲除濕藥則過病所誅罰無過故於
鼻取之猶物在高巔之上必射而取之也 丹溪云壯

實人氣實有痰或頭痛或眩暈大黃酒浸三次為末茶
調服

頭搖 風也火也二者皆主動會之於巔乃為搖也內

經曰狗蒙招尤目瞑耳聾下實上虛過在足少陽厥陰
註謂狗疾也蒙目不明招掉搖不定也尤甚也目疾不

明首掉尤甚又太陰之復頭項痛重掉瘳尤甚註謂濕氣內逆太陽上留胸中而掉瘳也靈樞謂督脉之別長強虛則頭重高搖之然病機有謂諸風掉眩皆屬肝木夫頭之巔足太陽之所過督脉與厥陰之所會是故三經所逆之火留聚於此者皆從風木而為掉搖也張仲景又言心絕者亦直視搖頭也

診 寸口之脉中手短者曰頭痛 推而下之下而不
上頭項痛 寸口緊急或短或弦或浮皆頭痛 浮滑

為風痰易治 短濇難治 浮緊為太陽 弦細少陽

浮緩長陽明 沉緩太陰 沉細少陰 浮緩厥陰

浮弦為風 浮洪為火 右寸滑或大或弦而有力

皆痰火積熱 細或緩兼體重者濕 左脉不足血虛

右脉不足氣虛 左右俱不足氣血俱虛 右寸緊

盛食積 右關洪大為胃熱上攻 寸口弦細為鬲上

有風涎冷痰或嘔吐 沉細為陰毒傷寒但頭痛身不

熱也 診頭痛目痛久視無所見者死 病苦頭痛目

痛脉急短瀋死

面痛

面痛皆屬火蓋諸陽之會皆在於面而火陽類也心者生之本神之變其華在面而心君火也暴痛多實久痛多虛高者抑之鬱者開之血熱者涼血氣虛者補氣不可專以苦寒瀉火為事許學士醫檢正患鼻頰間痛或麻痺不仁如是數年忽一日連口唇頰車髮際皆痛不開口言語飲食皆妨在頰與頰上常如糊手觸之則

痛此足陽明經絡受風毒傳入經絡血凝滯而不行故
有此證或以排風小續命透髓丹之類與之皆不効製
犀角升麻湯贈之數日愈夫足陽明胃也經云腸胃為
市又云陽明多血多氣胃之中腥羶五味無所不納如
市廛無所不有也以其腐熟飲食之毒聚於胃此方以
犀角為主解飲食之毒也陽明經脉環唇挾舌起於鼻
交頰中循頰車上耳前過客主人循髮際至頭顱今所
患皆一經絡也故以升麻佐之餘藥皆滌除風熱升麻

黃芩專入胃經 老母年七十餘累歲患煩車痛每多
言傷氣不寐傷神則大發發之劇則上連頭下至喉內
及牙齦皆如針刺火灼不可手觸乃至口不得開言語
飲食並廢自覺火光如閃電尋常涎唾稠粘如絲不斷
每勞與餓則甚得卧與食則稍安知其虛也始以清胃
散犀角升麻湯人參白虎湯羌活勝濕湯加黃芩甘桔
皆不効後改用參芪白朮芎歸升柴甘桔之類稍佐以
芩梔連翹泰粘空腹進之而食遠則服加減甘露飲始

漸安第老人性躁不耐閒勞與多言時有之不能除去
病根然發亦稀少即發亦不如往歲之劇矣 從子鋸
因喪子鬱結復多餌鹿角膠諸種子藥或於食後臨卧
輒進之以至積成胃熱遂患面痛如老母證服清胃散
甘露飲大加石膏過當而見虛證又服參耆等補藥過
當而復見火證門人施生以越鞠加山梔連翹貝母橘
紅之屬開其鬱結而始向安 諸方書無面痛門今補
之且具載上三條以見用藥不可執一耳非三條之足

以盡是病也

頸項強痛

經云東風生於春病在肝膈在頸項 諸瘕項強皆屬

於濕 缺盆之中任脉也名曰天突 當缺盆中 央動脉是 一次

任脉側之動脉足陽明也名曰人迎 挾喉兩 旁動脉 二次脉

手陽明也名曰扶突 挾喉動脉之後曲 頰之前一寸後是 三次脉手太

陽也名曰天聽 手陽明之後 當曲頰之下 四次脉足少陽也名曰

天容 曲頰之後 當耳之下 五次脉手少陽也名曰天牖 耳後當 完骨上

六次脉足太陽也名曰天柱

挾項大筋中

七次脉頸中

央之脉督脉也名曰風府

足陽明挾喉之動脉也其

腧在膺中

手陽明次在其腧外不至曲頰一寸

太

陽當曲頰

足少陽在耳下曲頰之後

手少陽出耳

後上加完骨之上

足太陽挾項大筋之中

然則頸

項強急之證多由邪客三陽經也寒搏則筋急風搏則

筋弛左多屬血右多屬痰

頸項強急發熱惡寒脉浮

而緊此風寒客三陽經也宜驅邪湯

頸項強急動則

微痛脉弦而數實右為甚作痰熱客三陽經治宜消風
豁痰湯 頸項強急動則微痛脉弦而濇左為甚作血

虛邪客太陽陽明經治宜疎風滋血湯 頸項強急寒

熱往來或嘔吐或脇痛宜小柴胡湯升麻防荊湯 頸

項強急腰似折項似拔加味勝濕湯 精神短少不得

睡項筋腫急難伸禁甘溫宜苦寒養神湯主之 本事

方椒附散治腎氣上攻項背不能轉側於虛寒者為宜

丹溪治一男子項強不能回顧動則微痛其脉弦而

數實右手為甚作痰客太陽經治之用二陳湯加酒洗黃芩羌活紅花服後二日愈 許學士治一人患筋急項不得轉側自午後發至黃昏時定此患必從足起經言十二經絡各有筋惟足太陽之筋自足至項大抵筋者肝之合也日中至黃昏天之陽陽中之陰也又曰陽中之陰肺也自離至兌陰旺陽弱之時故靈寶畢法云離至乾腎氣絕而肝氣弱肝腎二藏受陰氣故發於是時授以木瓜煎方三服而愈 戴云頸痛非是風邪即

是氣挫亦有落枕而成痛者並宜和氣飲食後服 按
人多有挫閃及久坐失枕而致項強不可轉移者皆由
腎虛不能生肝肝虛無以養筋故機關不利宜六味地
黃丸常服 內經刺灸項頸痛有二 其一取足手太
陽治項後痛經云足太陽之脉是動則病項如拔視虛
盛寒熱陷下取之又云項痛不可俛仰刺足太陽不可
以顧刺手太陽又云大風項頸痛刺風府風府在上椎
又云邪客於足太陽之絡令人頭項肩痛刺足小指爪

甲上與肉交者各一痛立已不已則刺外踝下三痛左
取右右取左如食頃是也 其二取足手陽明治頸前
痛經云足陽明之脉所生病者頸腫又云足陽明之脉
是動則頸項腫皆視盛虛寒熱陷下取之也

心痛胃脘痛

膈痛
心瘕

或問丹溪言心痛即胃脘痛然乎曰心與胃各一藏其
病形不同因胃脘痛處在心下故有當心而痛之名豈
胃脘痛即心痛者哉歷代方論將二者混同叙於一門

誤自此始蓋心之藏君火也是神靈之舍與手少陰之
正經邪皆不得而傷其受傷者乃手心主包絡也如包
絡引邪入於心之正經藏而痛者則謂之真心痛必死
不可治夫心統性情始由怵惕思慮則傷神神傷藏乃
應而心虛矣心虛則邪干之故手心主包絡受其邪而
痛也心主諸陽又主血是以因邪而陽氣鬱伏過於熱
者痛陽氣不及惟邪勝之者亦痛血因邪泣在絡而不
行者痛血因邪勝而虛者亦痛然方論雖有九種心痛

曰飲曰食曰風曰冷曰熱曰悸曰蟲曰疰去來其因固
多終不得聖人之旨豈復識六淫五邪不一之因哉且
五藏六府任督支脉絡於心藏府經脉挾其淫氣自支
脉乘於心而為痛者必有各府藏病形與之相應而痛
如靈樞謂厥心痛與背相控善瘕如從後觸其心偃僂
者腎心痛也厥心痛腹脹胸滿心尤痛甚胃心痛也厥
心痛痛如以錐針刺其心心痛甚者脾心痛也厥心痛
色蒼蒼如死狀終日不得太息肝心痛也厥心痛卧若

徙居心痛間動作痛益甚色不變肺心痛也更以陽明
有餘上歸於心滑則病心疝又心痛引少腹滿上下無
定處漉便難者取足厥陰心痛腹脹嗇然大便秘不利取
足太陰心痛短氣不足以息取手太陰心痛引背不得
息刺足少陰不已取手少陽與夫內經於六氣五運司
上下勝復淫邪應藏氣盛衰而相乘者亦必有諸淫氣
之病狀與心而痛是故苟不能徧識諸藏府所從來之
病因將何以施治哉胃脘痛亦如心痛有不一之因蓋

胃之真濕土也位居中焦稟沖和之氣多氣多血是水穀之海為三陽之總司五藏六府十二經脉皆受氣於此是以足之六經自下而上凡壯則氣行而已胃脘弱則著而成病其沖和之氣變至偏寒偏熱因之水穀不消停留水飲食積真氣相搏為痛惟肝木之相乘者尤甚胃脘當心而痛上支兩脇裏急飲食不下膈咽不通食則為食痺者謂食已心下痛吐乃止又腎氣上逆者次之逆則寒厥入胃亦痛夫如是胃脘之受邪非止

其自病者多然胃脘逼近於心移其邪上攻於心為心痛者亦多若夫心痛之病形如前所云者則詳矣今欲分胃脘不一病因之狀當何如曰胃之濕土主乎痞故胃病者或滿或脹或食不下或嘔吐或吞酸或大便難或瀉利面色浮而黃者皆是胃之本病也其有六淫五邪相乘於胃者大率與前所列心痛之形狀相類但其間必與胃本病參雜而見之也 活法機要云諸心痛者皆少陰厥陰氣上衝也有熱厥心痛者身熱足寒痛

甚則煩躁而吐額自汗出知其為熱也其脉浮大而洪
當灸太谿及崑崙謂表裏俱瀉之是為熱病汗不出引
熱下行表汗通身而出者愈也灸畢服金鈴子散則愈
痛止服枳實丸去其餘邪也有大實心中痛者因氣而
食卒然發痛大便或秘久而注悶心胸高起按之愈痛
不能飲食急以煮黃丸利之利後以藁本湯去其邪也
有寒厥心痛者手足厥逆而通身冷汗出便溺清利或
大便利而不渴氣微力弱急以朮附湯溫之寒厥暴痛

非久病也朝發暮死急當救之是知久病無寒暴病非熱也 丹溪云凡心膈痛須分新久若明知身受寒氣口喫寒物而得者於初得之日當與溫散或溫利之

溫散謂治身受寒氣於外者如陳無擇麻黃桂枝湯治外因心痛之類是也 溫利謂治口食寒物於裏者如

仲景九痛九潔古煮黃丸治大實心痛之類是也 病

得之稍久則成鬱矣鬱則蒸熱熱則生火若欲行溫散溫利寧無助火添病耶由是方中多以山梔仁為熱藥

之向導則邪易伏病易退正氣復而病安矣 大概胃

口有熱而作痛非山梔不可須薑汁佐之多用台芎開

之 金匱要畧云心中寒者其人病心如噉蒜狀劇者

心痛徹背背痛徹心譬如蠱注其脉浮者自吐乃愈

心痛徹背背痛徹心烏豆赤石脂丸主之 胸痺不得

卧心痛徹背者栝蒌薤白半夏湯主之 心胸中大寒

痛嘔不能飲食腹中寒上衝皮起出見有頭足上下痛

而不可觸近大建中湯主之 心中痞厥逆心懸痛桂

枝生薑枳實湯主之 右仲景方大抵皆溫散之劑有

寒結而痛者宜之 左脉浮弦或緊兼惡風寒者有外

邪宜藿香正氣散或五積散加薑蔥之類 外吸涼風

內食冷物寒氣客於腸胃之間則卒然而痛者二陳草

菓乾薑吳茱萸扶陽助胃湯草荳蔻丸之類 心膈痛

曾服香燥熱藥復作復劫轉轉深痼宜山梔子炒黑二

兩川芎香附

鹽水
浸炒

各一兩黃連

酒
炒

黃芩

酒
炒

木香檳榔各

二錢伍分赤麴番降香各五錢芒硝二錢為細末生薑

汁童子小便各半錢調二錢痛時呬下 仲景云按之

心下滿痛者此為實也當下之宜大柴胡湯凡脉堅實

不大便腹滿不可按並可承氣湯下之 有實積者脉

沉滑氣口緊盛按之痛宜小胃丹津下十五丸亦可服

厚朴丸紫苑丸 痰積作痛星半安中湯海蛤丸 火

痛清中湯 心膈大痛攻走腰背發厥嘔逆諸藥不納

者就吐中以鵝翎探吐之以盡其痰積而痛自止 外

臺治卒心痛黃連八兩水七升煮五升絞去渣溫服五

合日三 肘後治卒心痛龍膽草四兩酒三升煮一升
半頓服 仲景云心傷者其人勞役即頭面赤而下重
心中痛而自煩發熱臍跳其脉弦此為心藏所傷也可
服妙香散錢氏云心虛者炒鹽補之圖經衍義謂蠟粉
治心痛皆心傷之正藥也 以物拄按而痛者挾虛以
二陳湯加炒乾薑和之 按之痛止者為虛宜酸以收
之勿食辛散之劑 又有病久氣血虛損及素作勞羸
弱之人患心痛者皆虛痛也有服大補之劑而愈者不

可不知 氣攻刺而痛宜加味七氣湯沉香降氣散正
氣天香散治心痛但忍氣則發者 死血作痛脉必澀
作時飲湯水下或作呃壯人用桃仁承氣湯下弱人用
歸尾川芎牡丹皮蘇木紅花玄胡索桂心桃仁泥赤麴
番降香通草大麥芽穿山甲之屬煎成入童便酒韭汁
大劑飲之或失笑散 蟲痛面上白斑唇紅能食或食
即痛或痛後便能飲食或口中沫出上半月蟲頭向上
易治下半月蟲頭向下難治先以雞肉汁及糖蜜飲之

引蟲頭向上用集効丸或萬應丸剪紅丸之類下之

若因虵作痛虵攻啗心痛有休止其人吐虵或與之湯
飲藥餌轉入轉吐蓋緣物入則虵動虵動則令人惡心
而吐用川椒十數粒煎湯下烏梅丸 仲景云虵蟲為
病令人吐涎心痛發作有時毒藥不止甘草粉蜜湯主
之為脾受肝制而急故蟲不安用粉蜜之甘緩以安之

有腎氣逆上攻心以致心痛用生韭研汁和五苓散為
丸空心茴香湯下 病人舊有酒積食積痰積在胃脘

一遇觸犯便作疼痛挾風寒參蘇飲加薑蔥挾怒氣二
陳加青皮香附薑汁炒黃連挾飲食二陳加炒山梔麴
蘖草果山查挾火熱者二陳加枳實厚朴薑汁炒黃連
山梔加減越鞠丸川芎蒼朮香附神麴貝母炒梔子砂
仁草果參酌脉病施治 服寒藥多致脾胃虛弱胃脘
痛宜溫胃湯 寒濕所容身體沉重胃脘痛面色痿黃
宜朮桂湯 心脾痛用荔枝核為末每服一錢熱醋湯
調下 劉寄奴末六錢玄胡索末四錢薑汁熱酒調服

効白礬辰砂糊丸好醋吞下神効 心胃腹脇散痛
二陳加蒼朮諸香藥治之或沉香降氣散不愈則和其
血熱飲痛黃連甘遂作丸服之 冬寒停飲桂黃散
心極痛以生地黄汁調麵煮喫打下蟲積効 實痛
者手不可近六脉沉細甚有汗大承氣加桂強壯痛甚
者加桃仁附子連小腹痛虛寒作痛小建中湯 寒熱嘔
吐而痛脉沉弦大柴胡湯 脾虛積黃而痛胃苓湯
胃虛感冷而痛理中湯 內傷發熱不食胃口作痛補

中益氣湯加草豈菝熱痛加梔子 肥人心脾胃脘當

心痛或痞氣不食用草豈菝炒三稜白朮各一兩白豈

菝仁桂枝小草遠志莪朮丁香丁皮木香藿香炊餅丸

梧桐子大薑湯下三五十丸 胃脘停濕者溫中丸

脾胃不和而痛大安丸 因氣者加減木香檳榔丸

欬逆上氣痰飲心痛海蛤粉煨瓜蒌仁帶穰等分為末

和勻米糊丸 丹溪治許文懿公因飲食作痰成心脾

痛後觸風雪腿骨痛醫以黃芽歲丹烏附治十餘年艾

灸萬計又胃寒而痛加膻難開合脾疼時膻稍輕膻痛則脾疼止此初因中脘有食積痰飲續冒寒濕鬱遏經絡氣血不行津液不通痰飲注入骨節往來如潮湧上則為脾疼降下則為膻痛須湧泄之以甘遂末一錢入猪腰子內煨食之連泄七行足便能步後嘔吐大作不食煩躁氣弱不語記金匱云無寒熱而短氣不足以息者實見其病多年鬱結一旦泄之徒引動其猖獗之勢無他制御之藥故也仍以吐劑達其上焦次第治及中

下二焦連日用瓜蒂梨蘆苦參等藥俱吐不透而噦躁
愈甚乃用附子尖三枚和漿水以蜜飲之方大吐膠痰
一大桶以朴硝滑石黃芩石膏連翹等一斤濃煎置井
中極冷飲之四日服四斤後腹微痛二便秘脉歇至於
卯酉時予謂卯酉為手足陽明之應此乃胃與大腸有
積滯未盡當速瀉之諸醫惑阻乃作紫雪三日服至五
兩腹減稍安後又小便閉痛飲以蘿蔔子汁得吐立通
又小腹滿痛以大黃牽牛等分水丸服至三百丸下如

爛魚腸者二升許脉不歇又大便逆痛小腹滿悶又與
前丸藥百粒腹大絞痛腰胯重眼火出不言語瀉下穢
物如柏油條一尺許肛門如火以水沃之自病半月不
食不語至此方啜稀粥始有生意數日平安自嘔吐至
安日脉皆平常弦大次年行倒倉法全愈 治一人以
酒飲牛乳患心痛年久無汗醫多以丁附羸弱食減每
痛以物拄之脉遲弦而瀉又苦吞酸以二陳加苓連白
朮桃仁郁李仁澤瀉每旦服之湧出酸苦黑水并如爛

木耳者服至二百餘貼脉濇退至添純弦而漸充滿時
令暖意其欲汗而血氣未充以參朮歸芍陳皮半夏甘
草痛緩與麻黃倉朮芍歸纔下咽忽暈厥須臾而甦大
汗痛止 一童子久瘧方愈心脾痛六脉伏痛減時氣
口緊盛餘部弦而實意其宿食詢之果傷冷油麵食以
小胃丹津嚥下十餘粒禁飲食三日與藥十二次痛止
後又與穀太早忽大痛連脇乃禁食亦不與藥蓋宿食
已消今因新穀與餘積相迸而痛若再藥攻必傷胃氣

至夜心嘈索食先以白朮黃連陳皮丸服之以止其嘈
此非饑也乃餘飲未了因氣而動耳若與食復痛詢其
饑作膈間滿悶又與前丸子一晝夜不饑而昏睡後少
與粥漸安 一婦因久積憂患後心痛食減羸瘦渴不
能飲心與頭更換而痛不寐大便燥結以四物加陳皮
甘草百餘貼未効予曰此肺久為火所鬱氣不得行血
亦畜塞遂成汚濁氣壅則頭痛血不流則心痛通一病
也治肺當自愈遂效東垣清空膏例以黃芩細切酒浸

透炒赤色為細末湯下頭稍汗十餘貼汗漸通身而愈
因其膝下無汗瘦弱脉濇小便數大便澀當補血以防
後患以四物湯加陳皮甘草桃仁酒苓服之愈 一婦
春末心脾疼自言腹脹滿手足寒時膝須綿裹火烘胸
畏熱喜掀露風涼脉沉細濇稍重則絕輕似弦而短渴
喜熱飲不食以草豈寇仁三倍加黃連滑石神麴為丸
以白朮為君茯苓為佐陳皮為使作湯下百丸至二斤
而安 一婦形瘦色嫩味厚幼時曾以火烘濕鞋濕氣

上襲致吐清水吞酸服丁香熱藥時作時止至是心疼
有痞塊畧吐食脉皆微弦重似牆輕稍和與左金丸三
四十粒薑湯下三十餘次食不進予曰結已開矣且止
藥或思飲與水間與青綠丸脉弦漸添與人參酒芍藥
引金瀉木漸思食苦大便秘以生芍藥陳皮桃仁人參
為丸與之又以蜜導便通食進 一老人心腹大痛昏
厥脉洪大不食不勝一味攻擊之藥用四君子加川歸
沉香麻黃服愈 東垣治一婦人重娠六個月冬至因

慟哭口吸風寒忽病心痛不可忍渾身冷氣欲絕曰此乃客寒犯胃故胃脘當心而痛急與草豈蔻半夏乾生薑炙甘草並智仁之類或曰半夏有小毒重娘服之可乎曰乃有故而用也岐伯曰有故無殞故無殞也服之愈滑伯仁治一婦人盛暑洞泄厥逆惡寒胃脘當心而痛自腹引脇轉為滯下嘔噦不食人皆以中暑霍亂治之益甚脉三部俱微短沉弱不應呼吸此陰寒極矣不亟溫之則無生意遂以薑附三四進間以丹藥脉稍

有力厥逆漸退更服薑附七日而安 厥心痛者他藏
病干之而痛皆有治也真心痛者心藏自病而痛故夕
發旦死旦發夕死無治也然心藏之經絡有病在標者
其心亦痛而有治經云心手少陰之脉是動則病噤乾
心痛渴而欲飲又心主手少陰之脉所生病者心痛掌
中熱皆視盛虛熱寒陷下取之又經云手心主之別名
曰內關去腕二寸出於兩筋之間實則心痛取之兩筋
間也又云邪在心則病心痛喜悲時眩仆視有餘不及

調其俞是也 卒急心痛若脉洪大而數其人火熱盛者用前黃連龍膽草單方飲之若無熱者荔枝核之類治之若中惡心痛腹脹大便不通者走馬湯治之 海上方急救男子婦人心疼牙關緊急欲死者用隔年陳葱白三五根去皮鬚葉搗為膏將病人口幹開用匙將膏送入咽喉用香油四兩灌送下油不以多少但得葱下喉其人必甦一方用香油頓服一盞亦妙 經云邪客於足少陰之絡令人卒心痛暴脹胸脇支滿無積者

刺然骨之前出血如食頃而已不已左取右右取左病
新發者五日已 膈痛與心痛不同心痛則在歧骨陷
處本非心痛乃心支別絡痛耳隔痛則痛橫滿胸間比
之心痛為輕痛之得名俗為之稱耳諸方稱為煩躁忪
悸皆其證也五苓散瀉心小腸之熱恐非其對不若用
四物湯十全大補湯去桂生血而益陰此以水制火之
義 膈痛多因積冷與痰氣而成宜五膈寬中散或四
七湯加木香桂各半錢或撾脾湯加木香膈痛而氣上

急者宜蘇子降氣湯去前胡加木香如數 痰涎壅盛而痛者宜小半夏茯苓湯加枳實一錢間進半硫丸

心瘥亦痰飲所致俗名飲瘥有胃口熱食易消故瘥素問謂之食瘥亦類消中之狀俗名肚瘥痰氣宜小半夏茯苓湯加枳實一錢胃中熱宜二陳湯加黃連一錢或五苓去桂加辰砂 亦有病瘥呷薑湯數口或進乾薑劑而愈 此膈上停寒中有伏飲見辛熱則消 予讀中秘書時館師韓敬堂先生常患膈痛診其脉洪大而

濇子用山梔仁赤麴通草大麥芽香附當歸川芎煎湯
加薑汁韭汁童便竹瀝之類飲之而止一日勞倦忍饑
痛大發亟邀予至火房間曰晨起痛甚不能待公服家
兄藥吞下咽如刀割痛益甚不可忍何也予曰得非二
陳平胃烏藥紫蘇之屬乎曰然曰是則何怪乎其增病
也夫勞餓而發飽逸則止知其虛也飲以十全大補湯
一劑而痛止

診 脉多見於右關 陰弦為痛 微急為痛 微大

為心痺引背痛 短數為痛 濇為痛 痛甚者脉必
伏 大是久病 洪大數屬火熱 滑大屬痰 右手
實者痰積 沉滑者有宿食 弦遲者有寒 沉細而
遲者可治 堅大而實浮大而長滑而利數而緊皆難
治 真心痛手足俱青至節者不治

胸痛

心痛條有胸痛痞條有
胸痺宜與此條參看

經云南風生於夏病在心俞在胸脇又云仲夏善病胸
脇此則胸連脇痛屬心 肝虛則胸痛引背脇肝實則

胸痛不得轉側喜太息肝著則常欲蹈壓其胸經云春
脉如弦其氣不實而微此謂不及令人胸痛引背下則
兩脇脹滿此肝虛而其脉證見於春如此也宜補肝湯
金匱云肝中寒者兩臂不舉舌本燥喜太息胸中痛
不得轉側食則吐而出汗也 肝著其人常欲踏其胸
上先未苦時但欲飲熱旋覆花湯主之 素問曰陽明
所謂胸痛短氣者水氣在藏府也水者陰氣也陰氣在
中故胸痛少氣也輕者五苓散重者用張子和法取之

脉經云寸口脉沉胸中引脇痛胸中有水氣宜澤漆

湯及刺

開

闕瀉之水

灶土治胸脇痛徹背心腹痛

滿氣不得通及治痰欬大括萋去穰取子熟炒連皮研

和麵糊為丸如桐子大米飲下五十丸 斗門方治胸

膈壅滯去痰開胃用半夏洗淨焙乾搗羅為末生薑自

然汁和為餅子用濕紙裹於慢火中煨令香熟水一盞

用餅子一塊如彈丸大入鹽半分煎取半盞溫服

痰

丹溪治一人隔有一點相引痛吸氣皮覺急用滑石一

兩桃仁半兩枳殼炒一兩黃連炒半兩甘草炙二錢為
細末每服錢半以蘿蔔汁煎熟飲之一日五六次又治
一人因喫熱補藥又妄自學吐納以致氣亂血熱嗽血
消瘦遂與行倒倉法今嗽血消瘦已除因喫炒豈米膈
間有一點氣梗痛似有一條絲垂映在腰與小腹亦痛
大半偏在左邊此肝部有汚血行未盡也用滑石一兩
黃丹三錢枳殼一錢黃連五錢生甘草二錢紅花一錢
柴胡五錢桃仁二兩為細末每服一錢半以蘿蔔汁煎

沸服之 胸痛連脇脇支滿膺背肩胛兩臂內亦痛經云歲火太過則有此證其脉若洪數宜用降火涼劑

胸痛引背兩脇滿且痛引少腹經謂歲金太過與歲土不及風木大行而金復則有此疾是為金邪傷肝宜用補肝之劑 胸中痛連大腹小腹亦痛者為腎虛宜先取其經少陰太陽血後用補腎之劑 胸連脇肋髀膝外皆痛為膽足少陽木所生病詳盛虛熱寒陷下取之手心主之筋其病當所過者支轉筋前及胸痛息賁

治在燔針劫刺以知為數以痛為輸又足太陽之筋足少陽之筋痛皆引胸痛治在燔針劫刺以知為數以痛為輸也

腹痛

或問腹痛何由而生曰邪正相搏是以作痛夫經脉者乃天真流行出入藏府之道路也所以水穀之精悍為榮衛行於脉之内外而統大其用是故行六氣運五行調和五藏灑陳六府法四時升降浮沉之氣以生長化

收藏其正經之別脉絡在內者分守藏府部位各司其屬與之出納氣血凡是榮衛之妙用者皆天真也故經曰血氣人之神不可不謹養養之則邪弗能傷矣失之則榮氣散解而諸邪皆得從其藏府所虛之舍而入客焉入客則氣停液聚為積為痰血凝不行或瘀或畜脉絡皆滿邪正相搏真氣迫促故作痛也脾胃內舍心腹心肺內舍胸膈兩脇肝內舍肱脇小腹腎內舍小腹腰脊大小腸衝任皆在小腹此藏府所通之部位也曰舉

痛論叙腹痛一十四條屬熱者止一條餘皆屬寒後世方論因盡作風冷客之攻擊而作痛今予乃云諸邪何哉曰方論不會通諸篇之旨因不解篇末復謂百病皆生於氣列九氣之狀其間雖不言痛必亦為或有作痛者故也不然何乃出於諸痛篇之末耶試以靈樞百病始生篇觀之其旨則顯然矣所論邪有三部風雨傷於上清濕傷於下傷於上者病從外入內從上下也次第傳入舍於輸之時六經不通或著絡脉或著經脉或著

輸脉或著伏衝之脉或著腸胃之脉原皆得成積而痛傷於下者病起於足故積之始生得寒乃生厥乃成積厥氣生足惋惋生脛寒脛寒則血脉凝滯血脉凝滯則寒氣上入於腸胃入於腸胃則膜脹腸外之汁沫迫聚不得散日以成積傷於藏者病起於陰故卒然多食飲則腸滿起居不節用力過度則絡脉傷陽絡傷則血外溢血外溢則衄血陰絡傷則血內溢血內溢則後血腸胃之絡傷則血溢於腸外腸外有寒汁沫與血相搏則

并合凝聚不得散而積成矣卒然外中於寒若內傷於
憂怒則氣上逆氣上逆則六輸不通溫氣不行凝結蘊
裏而不散津液滲著而不去而積皆成矣自今觀之
此篇所謂成積作痛未至於癥瘕結塊之積乃汁沫聚
而不散之積也與舉痛論所謂血氣稽留不得行而成
積同也豈七情叙於篇末者之不同然於作痛乎然推
原二篇之意百病始生篇在乎三部之邪會而為痛故
相連而為言舉痛論在乎其邪各自為病所以獨引寒

淫一者亦為寒邪之能閉塞陽氣最甚故也用是為例
其他則可自此而推之矣至如七情之氣逆即傷其榮
衛而不行榮衛不行則液聚血凝及飲食用力過度者
亦然皆不待與寒相會始成積作痛也且如諸篇有言
胃氣實而血虛其脉奭散者當病食痺胃食則痛也有
言歲土太過濕淫所勝大腹小腹痛者有言衝脉之病
其氣溢於大腸而著於膏肓之原在臍下故環臍而痛
有言脾傳之腎少腹冤熱而痛有言肝熱病者腹痛身

熱有言腎虛者亦大腹小腹痛有言厥陰之厥小腹痛腫
脹太陰厥逆心痛引背有言六氣司上下之勝之復等
邪各隨其所入之部分而痛豈非諸邪各有自徑入作
痛初無與寒相關者耶難經云臍上牢若痛心內證也
臍下牢若痛腎內證也臍右牢若痛肺內證也臍左牢
若痛肝內證也方論之未備者不獨此而已至若厥心
痛五邪相乘者亦不能推及四藏與之無異豈五五二
十五陽之相移獨心而已哉更於五藏之症不干涉於

畢九止在腹中痛者猶未明也止知諸脉急者為疝未
知脉滑微有熱者亦病疝也其詳備見疝條且劉河間
嘗解急脉之意急脉固是寒之象然寒脉當短小而遲
非急數而洪也由緊脉主痛急而為痛甚所以痛而脉
有緊急者脉為心之所養也凡六氣為病則心神不寧
而緊急不得舒緩故脉亦從之而見也欲知何氣之為
病者適其緊急相兼之脉而可知也如緊急洪數則為
熱痛之類也此論可謂善推脉理病情者也曰諸邪之

作痛則聞命矣然其邪之博也奈何以治將亦有所守
要約之方乎曰自博而求約何患約之無其道不自博
而從事於約約必失其道失其道寧無實實虛虛誅伐
無過之患乎然其道要在於審經脉氣血之虛實辨六
淫五邪之有無兼氣於是擇至真大要諸治法中併五
鬱者之所當施而後選其經分祛邪補正適所宜之藥
配君臣佐使以為方夫如是而約之則猶約囊也無不
切中其病矣 東垣云夫心胃痛及腹中諸痛皆因勞

力過甚飲食失節中氣不足寒邪乘虛而入客之故卒然而作大痛經言得炁則止炁者熱也以熱治寒治之正也然腹痛有部分藏府有高下治之者亦宜分之如厥心痛者乃寒邪客於心包絡也前人以良薑菖蒲大辛熱之味末之酒調服其痛立止此直折之耳真心痛者寒邪傷其君也手足青至節甚則旦發夕死夕發旦死中脘痛者太陰也理中建中草豈菴丸之類主之臍腹痛者少陰也四逆輩附禦寒湯之類主之少腹痛者

厥陰也正陽散回陽丹當歸四逆湯之類主之雜證而
痛者苦楝湯酒煮當歸九丁香楝實丸之類主之是隨
高下治之也更循各藏部分穴俞而灸刺之如厥心痛
者痛如針刺其心甚者脾之痛也取之然谷太谿餘藏
皆然如腹中不和而痛者甘草芍藥湯主之如傷寒悞
下傳太陰腹滿而痛者桂枝加芍藥湯主之痛甚者桂
枝加大黃湯主之夏月肌熱惡熱脉洪疾而痛者黃芩
芍藥湯主之又有諸蟲痛者如心腹懊懣作痛聚往來

上下行痛有休止腹熱善渴涎出面色乍青乍白乍赤
嘔吐水者虵咬也以手緊按而堅持之無令得脫以針
刺之久持之蟲不動乃出針也或局方化蟲丸及諸蟲
之藥量虛實用之不可一例治也 海藏云秋腹痛肌

寒惡寒脉沉微足太陰足少陰主之桂枝芍藥湯中

腕痛太陰也理中建中黃芪湯之類 臍腹痛少陰也

四逆真武附子湯之類 小腹痛厥陰也重則正陽散

回陽丹之類輕則當歸四逆湯之類 太陰傳少陰痛

甚者當變下利而止 夏腹痛肌熱惡熱脉洪疾手太
陰足陽明主之芍藥黃芩湯治腹痛脉洪數 肚腹痛
者芍藥甘草湯主之稼穡作甘甘者已也曲直作酸酸
者甲也甲已化土此仲景妙方也 脉緩傷水加桂枝
生薑 脉洪傷金加黃芩大棗 脉瀦傷血加當歸
脉弦傷氣加芍藥 脉遲傷火加乾薑 丹溪云有寒
有熱有食積有濕痰有死血 綿綿痛而無增減欲得
熱手按及喜熱食其脉遲者寒也當用香砂理中湯或

治中湯小建中湯五積散等藥若冷痛用溫藥不効痛
愈甚大便不甚通當微利之用藿香正氣散每服加官
桂木香枳殼各半錢吞下來復丹或用蘇感丸不利則
量虛實用神保丸 時痛時止熱手按而不散其脉洪
大而數者熱也宜二陳平胃炒芩連或四順清涼飲黃
連解毒湯神芎丸金花丸之類若腹中常覺有熱而痛
此為積熱宜調胃承氣湯 感暑而痛或洩利併作其
脉必虛豁宜十味香薷飲六和湯 感濕而痛小便不

利大便秘澹洩其脉必細宜胃苓湯 痰積作痛或時眩

暈或嘔冷涎或下白積或小便不利或得辛辣熱湯則
暫止其脉必滑宜二陳加行氣之劑及星半安中湯

食積作痛痛甚欲大便利後痛減其脉必弦或沉滑宜
二陳平胃加山查神麴麥芽砂仁草果溫中丸枳木丸

保和丸木香檳榔丸之類 酒積腹痛用三稜蓬朮香

附官桂蒼朮厚朴陳皮甘草伏苓木香檳榔主之多年

敗田螺殼煨存性加三倍於木香檳榔丸中更加山茵

陳等分其効甚速 氣滯作痛痛則腹脹其脉必沉宜
木香順氣散 死血作痛痛有常處而不移其脉必澀或
訖宜桃仁承氣湯虛者加歸地蜜丸服以緩除之或用
牡丹皮江西紅麴麥芽香附川通草穿山甲番降香紅
花蘇木山查玄胡索桃仁泥酒童便各一鍾煎至一鍾
入韭汁服 七情內結或寒氣外攻積聚堅牢如杯心
腹絞痛不能飲食時發時止發即欲死宜七氣湯 腹
痛有作止者有塊耕起往來者吐清水者皆是蟲痛或

以雞汁吞萬應丸下之或以椒湯吞烏梅丸安之 金匱要畧問曰病腹痛有蟲其脉何以別之師曰腹中痛其脉當沉若弦反洪大故有虵蟲 關上脉緊而滑者虵毒 脉沉而滑者寸白 肘後麤以下三四寸熱者腸中有蟲 脾胃虛而心火乘之不能滋榮上焦元氣遇冬腎與膀胱之寒水旺時子能令母實致肺金大腸相輔而來尅心乘脾胃此大復其讐也經曰大勝必大復故皮毛血脉分肉之間元氣已絕於外又大寒大燥

二氣併乘之則苦惡風寒耳鳴及腰背相引胸中而痛
鼻息不通不聞香臭額寒腦痛目時眩目不欲開腹中
為寒水反乘痰唾涎沫食入反出腹中常痛及心胃痛
脇下急縮有時而痛腹不能努大便多瀉而少秘下氣
不絕或腸鳴此脾胃虛之極也胸中氣亂心煩不安而
為霍亂之漸膈咽不通噎塞極則有聲喘喝閉塞或日
陽中或暖房內稍緩口吸風寒則復作四肢厥冷身體
沉重不能轉側不可回顧小便溲而時燥以草豈菟丸

主之此主秋冬寒涼大復氣之藥也 復氣乘冬足太

陽寒氣足少陰腎水之旺子能令母實手太陰肺實反
來侮土火木受邪腰背胸膈閉塞疼痛善噦口中涎目
中泣鼻中流濁涕不止或有息肉不聞香臭咳嗽痰沫
上熱如火下寒如水頭作陣痛目中流火視物眊眊耳
鳴耳聾頭并口鼻或惡風寒喜日陽夜卧不安常覺痰
塞膈咽不通口無滋味兩脇縮急而痛牙齒動搖不能
嚼物腰膝間及尻臀膝足寒冷陰汗前陰冷行步欹側

起居艱難掌中寒風痺麻木小便數而晝多夜頻而少
氣短喘喝少氣不足以息卒遺失無度婦人白帶陰戶
中大痛牽心而痛鯁黑失色男子控睪牽心陰陰而痛
面如赭色食少大小便不調煩心霍亂逆氣裏急而腹
皮色白後出餘氣腹不能努或腸鳴膝下筋急肩胛大
痛此皆寒水來復火土之讐也以神聖復氣湯主之

季秋心腹中大痛煩燥冷汗自出宜益智和中丸 季
秋客寒犯胃心胃大痛不可忍者麻黃草豈菟丸 脾

胃虛寒心腹滿及秋冬客寒犯胃時作疼痛宜厚朴湯
為戍火已衰不能運化又加客氣聚為滿痛散以辛熱佐
以苦甘溫以淡泄之扶持胃氣以期平也 腹痛或大
便利或用手重按痛處不痛者為虛宜於已上治寒痛
方中選用之無寒者芍藥甘草湯 仲景云虛勞裏急
腹中痛小建中湯主之此補例也溫例也痛而秘者厚
朴三物湯主之此瀉例也寒例也 三陰受邪於心臍
少三腹疼痛氣風等證當歸丸主之 失笑散治心腹

痛効心痛門有劉寄奴玄胡索方亦治腹痛皆通理氣血之劑也 有全不喜食其人本體性怯弱而又加以腹冷疼者養胃湯以人參白朮蒼朮仍加桂茱萸各半錢木香三分應腹冷痛或心脾疼者加生薑均治之

諸寒作痛得炷則止者熨之用熟艾半斤以白紙一張鋪於腹上紙上攤艾令勻又以蔥蔥數枝批作兩半片鋪於艾上再用白紙一張覆之以慢火熨斗熨之冷則易之覺腹中熱腹皮暖不禁以帛三搭多縫帶繫之待

冷方解一法用鹽炒布裹熨痛處神効 腹痛證治上
條列之詳矣但有因別病而致痛者不可不明且如疝
致腹痛必是睪丸腫疼牽引而痛或邊有一條衝腹而
痛霍亂腹痛必吐利兼作甚有不嘔不利四肢厥冷痛
極者名乾霍亂又名攪腸沙急用樟木煎湯大吐之或
用白礬末一錢清湯調服探吐之或用台芎為末每一
錢許入薑汁半盞熱湯調服甚者面青昏倒不省人事
急以鼠矢一合研為細末滾湯調澄清通口服之或刺

委中并十指出血腸内生癰亦常腹痛但小便數似淋
脉滑數身甲錯腹皮急按之濡如腫狀或遠臍生瘡治
法見本門凡此數證要當審辨隨其所因而施治毋苟
且而誤人也

少腹痛 傷寒畜血在下焦宜抵當丸桃仁承氣之類

若因氣鬱而痛以青皮主之寒者以桂枝吳茱萸溫之

苦練丸

酒

煮當歸丸

若因疝奔豚癥聚者更掄本門施治若身

甲錯腹皮急按之濡如腫狀或遠臍生瘡者小腸癰也

急宜下之或以雲母膏太乙膏作丸服

診 脉多細小緊急 滑為痰 弦為食 陰弦或緊
或尺緊而實或伏者可下 細小遲者生 堅大疾者
數而緊者浮大而長者死 痛而喘臍下或大痛人中
黑色者不治

脇痛

或問脇痛從肝治復有可言者乎曰肝病內舍肱脇而
脇痛也則何異於心脉房舍膺脇而痛者哉若謂肝實

病而肱脇痛也則何異於肝木不及陽明所勝之肱脇痛者哉若謂由是厥陰肝經所過而痛也則何異於足少陽手心主所過而脇病者哉若謂獨經脉挾邪而痛也則病異於經筋所過而痛者哉豈執一說而可已乎非察色按脉徧識各經氣變雖在一病之中而辨其異狀者卒不能也且夫左右者陰陽之道路也是故肝生於左肺藏於右所以左屬肝肝藏血肝陽也血陰也乃外陽而內陰也右屬肺肺主氣肺陰也氣陽也外陰而

內陽也由陰陽互藏其左脇多因留血作痛右脇悉是痰積作痛其兩脇之病又可一槩而言乎若論其致病之邪凡外之六淫內之七情勞役飲食皆足以致痰氣積血之病雖然痰氣固亦有流注於左者然必與血相搏而痛不似右脇之痛無關於血也 戴云傷寒脇痛

屬少陽經合用小柴胡湯痛甚而不大便者於內加枳殼若尋常脇痛不係正傷寒時身體帶微熱者本事方中枳殼者散用枳殼桔梗細辛川芎防風各四分乾葛

錢半甘草一錢若只是脇痛別無雜證其痛在左為肝經受邪宜用川芎枳殼甘草其痛在右為肝經移病於肺宜用片薑黃枳殼桂心甘草此二方出嚴氏濟生續集加減在人又有肝膽經停痰伏飲或一邊脇痛宜用嚴氏導痰湯痰結成癖間進半硫丸蓋枳殼乃治脇痛的劑所以諸方中皆不可少曾見潘子先說有人脇痛下青龍湯痛止兼嗽得可此其痛必在右脇故也灼然知是寒氣作痛枳實理中湯為宜 挾外感風寒有表

證宜芎葛湯 中脘不快腹脇脹滿香橘湯 腹脇疼

痛氣促喘急分氣紫蘇飲 悲哀傷肝氣引兩脇疼痛

枳殼煮散 右脇痛推氣散 左脇痛枳芎散或柴胡

疎肝散 死血者日輕夜重或午後熱脉短澇或訖桃

仁承氣湯加鼈甲青皮柴胡芎歸之屬 若跌撲脇痛

者亦是死血宜復元活血湯破血散瘀湯 怒氣者脉

弦實有力大劑香附合芎歸之屬 痰飲停伏者脉沉

弦滑導痰湯加白芥子 戴云停飲脇痛本事方麵丸

最佳 食積痛凡痛有一條扛起者是也用保和丸或
吳茱萸炒黃連神麴麥芽山查蓮朮三稜青皮發寒熱
脇痛覺有積塊當歸龍薈丸 經云肝病者兩脇下痛
引少腹善怒又云肝氣實則怒左關必弦實鼓擊獨大
於諸脉知肝火盛也龍薈丸治肝實脇痛其人氣收者
善怒是也甚則用薑汁吞下經云風木淫勝治以辛涼
是也 因驚傷肝脇痛桂枝散 仲景云脇下偏痛發
熱其脉弦緊此寒也以溫藥下之宜大黃附子湯 煮

黃丸治脇下瘕癖痛如神 控涎丹治一身氣痛及脇

走痛痰挾死血加桃仁泥凡脇有痰流注二陳加南星

川芎蒼朮實者控涎丹下之 枳實散攻中有補虛人

可用 戴云曾有人脇痛連膈進諸氣藥并自大便導

之其痛殊甚後用辛熱補劑下黑錫丹方愈此乃虛冷

作痛愈疎而愈虛耳 肝氣不足兩脇下滿筋急不得

大息四肢厥冷發搶心腹痛目不明了爪甲枯口面青

宜補肝湯 左脇偏痛久宿食不消并目眵眊昏風淚

出見物不審而逆風寒偏甚宜補肝散肺肝虛寒脇下
痛脹滿氣急目昏濁視物不明其脉遲弱者宜檳榔湯
肝氣虛視物不明兩脇脹滿肋脉拘急面色青小腹
痛用山茱萸當歸山藥黃芪五味子木瓜川芎各一兩
半熟地黄白朮各一兩獨活酸棗仁各四銖為末每三
錢七棗二枚水一盞煎取八分空心服 房勞過多腎
虛羸怯之人胸膈之間多有隱隱微痛此腎虛不能約
氣氣虛不能生血之故氣與血猶水也盛則流暢少則

壅滯故氣血不虛則不滯既虛則鮮有不滯者所以作
痛宜用破故紙之類補腎芎歸之類和血若作尋常脇
痛治即殆矣 一人六月途行受熱過勞性又躁暴忽
左脇痛皮膚上一片紅如碗大發水泡瘡三五點脉七
至而弦夜重於晝醫作肝經鬱火治之以黃連青皮香
附川芎柴胡之類進一服其夜痛極且增熱次早視之
皮膚上紅大如盤水泡瘡又加至三十餘粒醫教以水
調白礬末敷仍於前藥加青黛龍膽草進之夜痛益甚

脇中如鈎摘之狀次早視之紅已及半身矣水泡又增至百數乃載以詢黃古潭為訂一方以大瓜蒌一枚重一二兩者連皮搗爛加粉草二錢紅花五分進藥少頃即得睡比覺已不痛矣蓋病勢已急而時醫執尋常瀉肝正治之劑又多苦寒愈資其燥故病轉增劇水泡瘡發於外者肝鬱既久不得發越乃侮所不勝故皮腠為之潰也瓜蒌味甘寒經云泄其肝者緩其中且其為物柔而滑潤於鬱不逆甘緩潤下又如油之洗物未嘗不潔

此其所以奏効之捷也歟 九靈山房集云里鍾姓者

一男子病脇痛衆醫以為癰也投諸香薷桂之屬益甚
項彥章診其脉告曰此腎邪病法當先溫利而後竭之
投神保丸下黑溲痛止即令更服神芎丸或疑其太過
彥章曰向用神保丸以腎邪透膜非全竭不能引導然
巴莖性熱非得芒硝大黃蕩滌之後遇熱必再作乃大
泄數出病已彥章所以知男子之病者以陽脉弦陰脉
微澀弦者痛也澀者腎邪有餘也腎邪上薄於脇不能

下且腎方惡燥今以燥熱發之非得利不愈經曰痛隨利減殆謂此也 雲中秦文山掌教平湖與家兄同官

每患脇痛遇勞忍餓則發介家兄書來求方予為處以人參黃芪白朮當歸川芎地黃牛膝木瓜山茱萸石斛薏苡仁酸棗仁柏子仁桃仁之屬令常服之後來謝云自服藥後積久之疾一朝而愈不復發矣聞魏崑溟吏部亦以勞餓得脇痛無大病也而醫者投以枳殼青皮破氣之藥痛愈甚不數日而殞予故著之以為世戒

診合腋張脇者肺下肺下則居賁迫肺善脇下痛
青色麤理者肝大肝大則逼胃迫咽則苦膈中且脇下
痛凡脇骨偏舉者肝偏傾肝偏傾則脇下痛揭唇
者脾高脾高則眇引季脇而痛寸口脉弦者即脇下
拘急而痛其人嗇嗇惡寒也脉雙弦是兩手俱弦也
沉瀦是鬱細緊或弦者怒氣

腰痛

腎著
腰輭

腰胯痛

六元正紀論云太陽所至為腰痛又云巨陽即太陽也

虛則頭項腰皆痛足太陽膀胱之脉所過還出別下項
循肩膊內挾脊抵腰中故為病項如拔挾脊痛腰似折
髀不可以曲是經氣虛則邪客之痛病生矣夫邪者是
風熱濕燥寒皆能為病大抵寒濕多而風熱少然有房
室勞傷腎虛腰痛者是陽氣虛弱不能運動故也經云
腰者腎之府轉搖不能腎將憊矣宜腎氣丸茴香丸之
類以補陽之不足也膏粱之人久服湯藥醉以入房損
其真氣則腎氣熱腎氣熱則腰脊痛而不能舉久則髓

減骨枯發為骨痿宜六味地黄丸滋腎丸封髓丹之類
以補陰之不足也靈樞云腰痛上寒取足太陰陽明上
熱取足厥陰不可俛仰取足少陽蓋足之三陽從頭走
足足之三陰從足走腹經所過處皆能為痛治之者當
審其何經所過分野循其空穴而刺之審何寒熱而藥
之假令足太陽令人腰痛引項脊尻背如重狀刺其郄
中太陽二經出血餘皆倣此彼執一方治諸腰痛者固
不通矣 有風 有濕 有寒 有熱 有挫閃 有

瘀血 有滯氣 有痰積 皆標也 腎虛其本也 風

傷腎而痛其脉必帶浮或左或右痛無常處牽引兩足

宜五積散每服加防風半錢全蝎三箇小續命湯獨活

寄生湯皆可選用

三因方小續命湯加炒去
皮桃仁治風腰痛最妙

仍吞三仙

丹杜仲薑汁炒研末每一錢溫酒調空心服治腎氣腰

痛兼治風冷為患名杜仲酒三因又有牛膝酒治腎傷

風毒攻刺腰痛不可忍者 傷濕而痛如坐水中蓋腎

屬水久坐水濕處或為雨露所著雨水相得以致腰痛

其脉必帶緩遇天陰或久坐必發身體必帶沉重宜滲
濕湯主之不効宜腎著湯或生附湯 風濕腰痛獨活
寄生湯 寒濕腰痛五積散加桃仁川芎肉桂湯麻黃
蒼朮湯并摩腰膏 濕熱腰痛蒼朮湯獨活湯羌活湯
東垣云如身重腰沉沉然乃經中有濕熱也於羌活勝
濕湯中加黃檗一錢附子五分蒼朮二錢 感寒而痛
者腰間如水其脉必緊見熱則減見寒則增宜五積散
去桔梗加吳茱萸半錢或薑附湯加辣桂杜仲外用摩

腰膏 傷熱而痛者脉必洪數而滑發渴便閉宜甘荳
湯加續斷天麻間服敗毒散 若因閃挫或擗撲傷損
而痛者宜乳香趁痛散及黑神散和復元通氣散酒調
下不効則必有惡血停滯宜先用酒調下蘇合香丸仍
以五積散加桃仁大黃蘇木各一錢當歸倍原數若因
勞役負重而痛宜和氣飲或普賢正氣散或十補湯下
青娥丸 挫閃腰痛不能轉側用陳久神麴一大塊燒
通紅淬老酒去麴以酒通口吞青娥丸仰卧片時未効

再服不用丸亦得又方以茴香根同紅麴搗爛好熱酒調服東垣云打撲傷損從高墜下惡血在太陽經中令人腰脊痛或脛膕臂膊中痛不可忍鼻壅塞不通地龍湯主之橘核酒熟大黃湯丹溪治徐質夫年

六十因墜馬腰痛不可轉側六脉散大重取則弦小而長稍堅此雖有惡血未可驅逐且以補接為先遂令煎蘇木人參黃芪川芎當歸陳皮木通甘草服至半月飲食漸進遂與前藥調下自然銅等藥一月而安瘀血

為病其脉必瀉轉側若錐刀之刺大便黑小便赤黃或
黑日輕夜重名瀝血腰痛宜調榮活絡飲或桃仁酒調
黑神散或四物湯加桃仁紅花之類丹溪用補陰丸中
加桃仁紅花主之 氣滯而痛其脉必沉宜人參順氣
散或烏藥順氣散加五加皮木香入少甘草煎湯調下
或用降真香檀香沉香共一兩重煎湯空心服 疾

注而痛其脉必滑或伏宜二陳湯加南星香附烏藥枳

殼主之 食積腰腿痛用龜板

酒炙

柏葉

酒製

香附

五錢

辣芥

子凌霄花

一錢五分

酒糊丸煎四物湯加陳皮甘草一分吞

下食積痰積如氣實脉有力者宜下之 歲靈仙治

痛之要藥為細末每服二錢猪腰子一隻批開摻藥在

內濕紙包煨熟五更細嚼熱酒下以微利為度 本事

方治五般腰痛用胡桃肉五個去皮殼研為膏五靈脂

黑牽牛

炒

白牽牛

炒

各三錢狗脊

微炒

半兩萆薢

炒

三錢

沒藥三十文巴豆五粒用濕紙包煨取肉去油右為末

入前胡桃膏醋糊丸如桐子大每服十五丸風腰疼豈

淋無灰酒下氣腰疼煨蔥白酒下血腰疼當歸酒下打撲腰疼蘇木酒下 張子和治趙進道病腰疼一年不

愈診其兩手脉沉重有力以通經散

陳皮當歸甘遂為末每三錢臨卧溫

酒調

下五七行次以杜仲去麤皮細切炒斷絲為末每

服三錢猪腰子一枚薄批五七片先以椒鹽淹去腥水

摻藥在內裹以荷葉以濕紙數重封文武火燒熟臨卧

細嚼溫酒送下每旦以無比山藥丸一服數日而愈

治腰痛牽引足膝脚腫屢用神効杜仲薑汁炒去絲續

斷黑牽牛破故紙桃仁炒去皮尖玄胡索各等分為細末酒煮麵糊胡桃肉和丸如桐子大每服五七十丸食前溫酒白湯任下

已上俱用下藥實者宜之

腰膝連脚膝曉夜疼

痛宜虎骨散補骨脂丸百倍丸養腎散選而用之大抵諸腰痛皆起腎虛既挾邪氣則須除其邪如無外邪積滯而自痛則惟補腎而已腰肢痿弱身體疲倦脚膝痠軟脉或洪或細而皆無力痛亦攸攸隱隱而不甚是其候也亦分寒熱二證脉細而無力怯怯短氣小便清

利是為陽虛宜腎氣丸茴香丸鹿茸羊腎之屬或以大建中湯加川椒十粒吞下腰腎丸及生料鹿茸丸之類仍以茴香炒研末破開猪腰子作薄片勿令斷層層摻藥末水紙裹煨熟細嚼酒嚥此皆所以補陽之不足也其脉洪而無力小便黃赤虛火時炎是謂陰虛東垣所謂膏粱之人久服湯藥醉以入房損其真氣則腎氣熱腎氣熱則腰脊痛而不能舉久則髓減骨枯發為骨痿宜六味丸滋腎丸封髓丹補陰丸之類以補陰之不足

也 楊仁齋云經云腰者腎之府轉搖不能腎將憊矣
審如是則病在少陰必究其受病之源而處之為得雖
然宗筋聚於陰器肝者腎之同系也五藏皆取氣於穀
脾者腎之倉廩也鬱怒傷肝則諸筋縱弛憂思傷脾則
胃氣不行二者又能為腰痛之寇故併及之鬱怒傷肝
發為腰痛宜調肝散主之憂思傷脾發為腰痛宜沉香
降氣湯和調氣散薑棗煎主之 煨腎丸治肝腎損及
脾損穀不化腰痛不起者神効 又有沮剋失志傷腎

而痛者和劑七氣湯多加白茯苓少加乳香沉香主之
瘡痢後腰痛及婦人月經後腰痛俱屬虛宜補於補
氣血藥中加杜仲側柏葉主之 丹溪云久腰痛必用
官桂開之方止腹脇痛亦然橘香丸治腰痛經久不瘥
亦用官桂開之之意也

腎著為病其體重腰冷如冰飲食如故小便自利腰以
下冷痛如帶五千錢治宜流溫兼用溫散腎著湯

腰胯痛腰痛足太陽膀胱經也胯痛足少陽膽經之所

過也若因傷於寒濕流注經絡結滯骨節氣血不和而致腰胯痛者宜除濕丹或滲濕湯加芍藥青皮蒼朮檳榔有痰積鬱滯經絡流搏瘀血內亦作痛用導痰湯加檳榔青皮芍藥實者禹攻散濕熱腰胯作疼宜清濕散腰輭丹溪以為腎肝伏熱治宜黃蘗防已

診 大者腎虛 瀉為瘀血 緩為寒濕 或滑或伏為痰 尺沉為腰背痛 尺脉沉而弦沉為滯弦為虛沉弦而緊為寒 沉弦而浮為風 沉弦而瀉細為

濕 沉弦而實閃肭 腎憊及盛怒傷志則腰失強不

能轉搖而死

經云腎者腰之府轉搖不能腎將憊矣得強者生失強者死又云腎盛怒而不止則

傷志志傷則善忘其前言腰脊不可以
俛仰屈伸毛悴色夭死於季夏是也

脊痛脊強

內經刺灸脊痛脊強有三法 其一取督脉經云督脉

之別名曰長強別走太陽實則脊強取之所別也 其

二取足太陽經曰厥挾脊而頭者至頂頭沉沉然目眊

眊然腰脊強取足太陽膕中血絡是也 其三取小腸

經云小腹控臑引腰脊上衝心在小腸取之育原以散之刺太陰厥陰以下之取巨虛下廉以去之是也 脊痛項強腰似折項似拔衝頭痛乃足太陽經不行也羌活勝濕湯主之 打撲傷損從高墜下惡血在太陽經中腰脊痛不可忍地龍湯主之

肩背痛

肩背分野屬肺經云西風生於秋病在肺肺在肩背故秋氣者病在肩背又云肺病者喘咳逆氣肩背痛汗出

又云秋肺太過為病在外則令人逆氣背痛愠愠然又云肺手太陰之脉氣盛有餘則肩背痛風寒汗出氣虛則肩背痛寒少氣不足以息此肺金自病也 經云歲火太過民病肩背熱又云少陰司天熱淫所勝病肩背臑缺盆中痛此肺金受火邪而病也 經云邪在腎則病肩背頸項痛取之湧泉崑崙視有血者盡取之是腎氣逆上而痛也 東垣云肩背痛不可回顧此手太陽氣鬱而不行以風藥散之 脉經云風寒汗出肩背痛

中風小便數而欠者風熱乘其肺使肺氣鬱甚也當瀉
風熱以通氣防風湯主之 按風寒汗出而肩背痛小
便數者既以瀉風熱之藥通肺氣之壅則寒熱氣不足
以息而肩背痛小便遺失者當以人參黃芪之屬補肺
氣之虛不言可知也 濕熱相搏肩背沉重而疼者當
歸拮痛湯 當肩背一片冷痛背脊疼痛古方用神保
丸愈者此有積氣故也 其人素有痰飲流注肩背作
痛宜星香散或導痰湯下五苓丸 有腎氣不循故道

氣逆挾脊而上致肩背作痛宜和氣飲加鹽炒小茴香
半錢炒川椒十粒 或看書對奕久坐而致脊背疼者
補中益氣湯或八物湯加黃芪 有素虛人及病後心
膈間痛或牽引乳脇或走注肩背此乃元氣上逆當引
使歸元不可復下疎刷之劑愈刷愈痛發汗人患此者
衆惟宜溫補拘於氣無補法之說誤矣汗者心之液陽
受氣於胸中汗過多則心液耗陽氣不足故致疼也

丹溪治一男子忽患背胛縫有一線疼起上跨肩至胸

前側脇而止其痛晝夜不息不可忍其脉弦而數重取
豁大左大於右夫脾小腸經也胸脇膽經也此必思慮
傷心心藏未病而府先病故痛從背胛起及慮不能決
又歸之膽故痛至胸脇而止乃小腸火乘膽木子來乘
母是為實邪詢之果因謀事不遂而病以人參四錢木
通二錢煎湯下龍薈丸數服而愈

診 脉洪大洪為熱大為風 脉促上擊者肩背痛
脉沉而滑者背脊痛

臂痛

臂痛有六道經絡究其痛在何經絡之間以行本經藥行其氣血血氣通則愈矣以兩手伸直其臂貼身垂下大指居前小指居後而定之則其臂肱之前廉痛者屬陽明經以升麻白芷乾葛行之後廉痛者屬太陽經以藁本羌活行之外廉痛者屬少陽經以柴胡行之內廉痛者屬厥陰經以柴胡青皮行之內前廉痛者屬太陰經以升麻白芷葱白行之內後廉痛者屬少陰經以細

辛獨活行之并用針灸法視其何經而取之 臂為風
寒濕所搏或飲液流入或因提挈重物皆致臂痛有腫
者有不腫者除飲證外其餘諸痛並可五積散及烏藥
順氣散或蠲痺湯 若坐卧為風濕所搏或睡後手在
被外為寒邪所襲遂令臂痛宜五積散及蠲痺湯烏藥
順氣散審知是濕蠲痺湯每服加蒼朮三匙防已四分
或用五痺湯 曾有挈重傷筋以致臂痛宜琥珀散劫
勞散或和氣飲每服加白薑黃半錢以薑黃能入臂故

也痰飲流入四肢令人肩背痠疼兩手軟痺醫誤以
為風則非其治宜導飲湯加木香薑黃各半錢如未効

輕者指迷茯苓丸重者控涎丹

控涎丹加去油木鼈子
一兩桂五錢治臂痛每

服二十九加
至三十九

外有血虛不榮於筋而致臂痛宜蠲痺

湯四物湯各半貼和勻煎服有氣血凝滯經絡不行

而致臂痛宜舒筋湯治臂痛半夏一錢陳皮半錢茯苓

苓五分蒼朮二錢歲薑仙五分酒苓白朮南星香附各

一錢甘草少許紅花神麴炒為末薑黃四兩甘草

羌活各一兩白朮二兩 茯苓丸治臂痛如神赤茯苓

防風細辛白朮澤瀉官桂各半兩瓜蒌根紫苑附子黃

芪芍藥甘草炙各七錢半生地黄牛膝

酒浸

山芋獨活半

夏

酒浸

山茱萸各二錢半為細末煉蜜丸如桐子大每服

十丸溫酒下

手氣手腫痛或掌指連臂膊痛宜五痺湯蠲痺湯 薄

桂味淡能橫行手臂令他藥至痛處 白薑黃能引至

手臂尤妙

身體痛

身體拘急

體痛謂一身盡痛傷寒霍亂中暑陰毒濕痺痛痺皆有
體痛但看兼證及問因診脉而別之治法已分見各門
其留連難已者於此求之 寒而一身痛者甘草附子
湯 熱者拈痛湯 內傷勞倦飲食兼感風濕相搏一
身盡痛者補中益氣湯加羌活防風升麻藁本蒼朮治
之 濕熱相搏肩背沉重疼痛上熱胸膈不利徧身疼
痛宜拈痛湯 陰室中汗出嬾語四肢困倦乏力走注

疼痛乃下焦伏火不得伸浮而躁熱汗出一身盡痛蓋
風濕相搏也以麻黃發汗漸漸發之在經者亦宜發汗
況值季春之月脉緩而遲尤宜發之令風濕去而陽氣
升困倦乃退血氣俱得生旺也麻黃復煎湯主之丹溪
用蒼朮一兩黃檗半兩羌活歲靈仙各二錢半薑搗服
徧身皆痛如勞證者本事方用黃芪人參甘草附子
炮羌活木香知母芍藥川芎前胡枳殼桔梗白朮當歸
茯苓半夏製已上各五錢柴胡鼈甲醋炙各一兩桂心酸

棗仁各三分杏仁

炒


半兩右為末每服四錢水一盞薑

三片棗二個烏梅三枚葱白三寸同煎至七分空心溫服但少年虛損冷僂老人諸疾並皆治之惟傷寒身體痛者不可服活血丹與四物蒼朮各半湯相表裏治偏身骨節疼痛如神

身體拘急 皆屬寒與寒濕風濕經云諸寒收引皆屬於腎又云太陰司天之政民病寒厥拘急初之氣風濕相搏民病經絡拘強關節不利治法蓋小續命湯仲景

三黃湯之類是也

診 傷寒太陽經表證六脉俱緊陰毒傷寒身如被杖
脉沉緊 傷寒發汗後身體痛氣血未和脉弦遲 傷
濕流關節一身盡痛風濕相搏肢體重痛不可轉側脉
緩 虛勞人血氣虛損脉弦小或豁大



證治準繩卷八